

0 10 20 30 40 50 60 70 80 90 100 110 120 130 140 150 160 170

22-6512
4432-46
= 26



Kodak Color Control Patches

1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32

蘇州府志卷第八十五

人物目錄

宦績十

本朝

金之俊

王澧

父曰俞弟漢孫守烈

錢朝鼎

子瓚

吳之紀

祖瑞徵

孫魯

吳翹

子祖修

徐籀

顧子咸

孫爾昌

翁長庸

子大中翁需

邵燈

宋德宜

兄德宸子駿業


弟德宏大業

徐乾學

子樹穀敏

樹屏

炯駿樹



徐秉義

子樹閔

彭瓏

許定升

陸在新

吳樹臣

顧沂

翁叔元

張登第

陳陸虬

錢士鉉

徐元文

子樹本

樹聲

潘見龍

子家顧

吳一蜚

鈕琇

趙廷珪

父延先

顧藻

孫灝如

歸允肅

父起先

陸經遠

張映葵

張孟球

子學庠

企齡

紹賢 應造 景祁

蔣陳錫

子漣

洞 澍 澍

子樹

張壘

湯傳桀

弟孝揚

陶元淳

子貞一 廷埴

孫廷墀

張孝時

嚴虞惇

父熊

顧楷仁

許穀

父豐

子朝

費洪學

蔣廷錫

子洲

吳士玉

陸賜書

趙成穠

蔣杲

朱永

劉澤乾

陳鴻熙

子樹華

程國棟

蘇本潔

尤秉元

邵世泰

曾祖世茂
子玉瓚

王錫

葉士寬

歸宣光

子夢燿

熙

徐德秩

徐德裕

蘇州府志卷第八十五

人物

宦績十

本朝

○金之俊字彥章吳江人後徙郡城明萬曆己未進士授中書舍人轉南禮部主事晉郎中出知順德府陞湖廣副使遷江西參政歷寧州口北固原順廣諸道皆有政績擢僉都御史巡撫京東督治昌平進兵部添註右侍郎李自成破京師之俊被執受刑賊敗歸 本朝仍授兵部右侍郎調吏部順治五年晉工部尚書改兵部十年改左都御史陞吏部尚書十一年晉國史院大學士乙未主會試十五年以更定官制為

中和殿大學士歷加太傅復改內秘書院大學士康熙元年致仕卒年七十七謚文通之後以才幹受知

世祖恩禮優渥故明時江浙白糧民運每至破家之後疏陳其弊遂改官運有息齋集行世

舊府志

○徐籀字亦史吳縣人明崇禎六年舉人高才博學風流蘊藉

本朝康熙初

吳志選舉表作順治間

由靖江教諭遷知黃岡縣事愛

民息訟薄賦省刑見囚輒泣下欲生之士民皆感激時邑多大災燬民居籀捐二千餘金分賑又修建學宮補葺古跡文物燦然在官無泛交紳士端方博雅者延致加禮邑人謂以文學治者必首推焉著有吾邱五集寓黃小草歿崇祀名宦

黃岡縣志

○王澧字楚先常熟人父曰俞字喜賡少勤學父母憐而節之乃帷燈潛誦以舉人教諭六合明崇禎末與子澧同登進士知餘姚縣期年去官本朝順治元年澧以薦起爲行人奉使河南丁酉分校京闈遷工部都水主事權南新關陞屯田員外郎治山東南旺湖搜湮浚新使岱畎之水皆有所歸終金華知府弟澐字文筠康熙五年舉人官溧陽教諭孫守烈字大武少與其兄守勳並有文譽康熙庚辰進士授司經局正字補刑部主事遷員外郎執法不少假洗心泣職不受私謁陞禮部郎中出知贛州府卒

縣志

○顧予咸字小阮長洲人順治丁亥進士授寧晉知縣畿南多盜廉其魁數人捕弗誅厚衣食之使為耳目他盜悉驚散縣地多不耕上官徵賦如故力爭乃免豪家多賄胥匿田以累貧弱乃閉胥室中使盡書所匿又令民得自首而賦役遂平居數月縣大治調知山陰時浙東初附山藪多不靖官兵所至殺平民為功而俘其婦女予咸悉縱遣之請於督撫但罷兵以屬令一月可辨如其言兵罷而民歸兩舉卓異擢刑部主事調吏部遷考功員外郎時當掌計遂移疾歸十八年春世祖大行遺詔至蘇巡撫以下大臨府治有諸生十八人面訐吳縣令不法事巡撫朱國治庇令欲置諸生重辟而畏予咸

剛直從而請曰令無罪當罪諸生予咸正色曰諸生訐令事皆實何罪當罪令國治忌之遂密告金陵會勘大臣逮予咸繫獄坐以指使論絞獄上奉 旨復官尋入以奏銷案落

職居鄉風采峻整為後進所憚歿後數十年里人立祠祀之

舊志子嗣立別有傳

孫爾昌官寧夏知府乾隆三年地震死事聞贈太僕少卿 賜祭葬廕一子

○錢朝鼎字禹久常熟人順治丁亥進士授刑部主事歷員外郎中遷廣東提學道為天下學政第一陞浙江按察使發姦摘伏無偏徇桐廬有僕弑主移獄於主妾與一童子為姦殺已誣服矣朝鼎視妾一弱女童子尤孱羸而僕為之證者目動而言詐乃厲聲詰曰弑主者汝也僕驚具服遂出二人罪

湖有盜黨竄入司署爲吏每鞠是獄立案傍刺探獄情陰爲營救朝鼎疑而訊之遂并伏辜超擢副都御史忌者借欵案未結劾之會丁內艱歸服闋補鴻臚卿遷大理少卿山西有烈婦不受鄰人挑自縊死婦已旌鄰人僅擬遣戍朝鼎爭之曰戍者尙可生還異日掉臂出入烈婦坊下天理與國法俱隳矣法司乃從其議卒以前忌者鐫級罷歸子瓚字孚美康熙己酉舉人知館陶縣有善政官至戶部員外郎

舊志參常昭新志

○翁長庸字玉字常熟人順治丁亥進士授戶部主事權蕪湖關溢稅四萬餘金盡數解部厯官至長蘆運使參政河南臨事敬慎待百姓如家人聽訟諄諄勸諭多感泣謝去先是中

州下治田令州縣僞報起科至數千頃察之石田也亟請於大吏免其租役秩滿當遷按察使不願典獄遂告歸其貧不異爲諸生時也著春秋因是詩文有蓼野集子大中字林一舉進士知上杭縣縣輸賦向有額外公費大中盡革之又令納戶自封投櫃民稱便歲旱米貴大中開倉平糶且捐米以給不能辦值者埋齒掩骼善政多可紀卒於官杭民醵金歸其櫬祀名宦同邑翁需字雲將與長庸同舉於鄉教諭和州遷上杭知縣正風俗革耗羨禁蠱毒每當讞決反覆諭以情理訟者常涕泣釋爭而去

常昭新志

○吳之紀字小修吳江人祖瑞徵明萬厯庚戌進士官至河南

副使以廉能稱之紀生有夙慧年十二就童子試知縣熊開元大爲稱賞順治己丑成進士授工部主事遷湖廣按察僉事修築堤防置豐樂湖渡船楚人頌之投劾歸室中蕭然書法米芾詩秀婉古文擬歐陽所著有適吟詩草好我齋集舊志

○邵燈字薪傳常熟人弱冠舉於鄉江南賦稅舊簽大戶收解往往破產燈議按畝貼役以官吏董其事條上遂爲定例順治壬辰登進士除中書量移比部明敏無留獄律比務從輕條康熙間厯官河南河道向開引河所上工狀率不以實燈親馳閱視計所當濬者十之二三餘皆罷之省官帑萬計河工夫柳諸項派在八郡協供頗有乾沒燈戒飭不使浮冒勤

其官以歿著有河防要略

常昭新志

○孫魯字孝若常熟人廣東布政朝肅子順治壬辰進士授衢州府推官西安民祝廿五爲從子所殺埋尸滅跡獄久未決魯廉察得實案治從子與其黨如法其餘多所平反遠近翕然稱神明陞高州府同知缺裁補紹興府同知俸滿遷大同知府大同近邊而俗朴民未知禮魯到官首行鄉飲酒禮舉故總兵麻振揚爲大賓禮儀秩然民間驚告爲盛事設義學拔諸生文行優者以爲師比屋有絃誦聲 大兵討吳三桂調發旁午魯辦理芻糧有法民以不擾以母老乞終養尙書魏象樞聞之歎曰家有孝子國少一廉吏矣歸里後貧甚杜

門侍母色養備至會母病卒魯哀慕逾年亦卒

舊府志

○宋德宜字右之長洲人明御史學朱子順治乙未進士選庶

吉士授編修遷司業轉侍讀歷祭酒侍讀學士充日講起

居注官經筵講官內閣學士遷戶部侍郎仍兼翰林學士

調吏部陞左都御史尋進兵部尚書轉吏部康熙二十三年

拜文華殿大學士加太子太傅二十六年以疾卒於官年六

十二德宜風度端凝學問淵博自爲司業至大學士未嘗少

有折挫爲都御史時上疏請弛海禁俾濱海民藉佃漁資生

計請定鹽法考課裁省筆帖式禁通販硫黃硝以殄寇盜又

言捐納授官非經久制請限以月或以年庶官方可澄所言

次第舉行又率同寮上言各處統兵大將軍王以下玩寇殃
民遷延歲月或掠取婦女或攘奪財物請嚴飭禁絕

上是之命王大臣速議行山東大帥柯永綦縱兵鼓譟德宜疏
劾卽命逮訊其掌本兵也蜀地初定大軍糗糧皆運自陝西
棧道顛踣秦民大困會星變德宜言今大軍趨黔望秦蜀之
餉然徵秦則以道遠誘之蜀徵蜀則以歲飢誘之秦彼此觀
望莫若併川陝總督爲一人則痛癢相關可以隨地調發

詔從之在部三年滇黔粵蜀以次削平時俘獲賊中婦女
並著籍旗下德宜言脅從者不與倡亂同罪且婦女何辜宜
聽收贖於是所釋甚衆德宜口訥造次不能達其詞至於國

家大事議論侃侃同列意見不合輒為剖晰是非反覆開導或自為一議

上善其所陳輒報可性孝友年十七以父學朱巡按山東死事狀伏闕上書得贈卹在都聞弟喪兼程還經紀其後事撫育孤女踰已出惇於宗族貧者輒周以粟與兄德宸弟德宏早著文譽一時有三宋之目德宸字御之後改名宓康熙丁巳舉順天鄉試德宏字疇三少負才名出兩兄上與諸文士倡慎交社順治辛卯舉順天鄉試年甫三十四卒寒峻有文采者雖不相識汲引不倦其卒也

上聞軫悼諡文恪與祭葬長子駿業字聲求輕財好施善書畫由副榜累官兵部右侍郎次子大業字念功康熙乙丑進士

選庶吉士授編修癸酉主江西鄉試得朱軾於落卷中拔寘第一士論翕服 大兵征噶爾丹大業自請運糧千石以軍

功陞右贊善累遷內閣學士卒

舊府志

○吳翹字羽三吳江人少能文與兄翺翺齊名既長有智略喜談兵舉順治乙未進士知澄邁縣時瓊州甫定民疲盜熾外寇交訐翺撫安流亡訓練鄉勇擒斬叛黎招降海賊在兵間五年屢有功為總兵官高進庫所抑丁母艱歸後歷知豐城漢川二縣翺長於詩泣官所至與士大夫相倡和所著有松巖集子祖修字慎思豪邁有父風亦長於詩同郡何焯吳士玉輩皆敬重之及困場屋以諸生終著有柳塘詩集十二卷

舊府志參
新縣志

○徐乾學字原一號健庵崑山人太僕少卿應聘曾孫八歲能文爲顧錫疇所知十三通五經康熙庚戌進士第三授編修壬子主試順天乾學常病士子治經義不務實學專趨時好人材日壞至是苦心搜閱拔韓菼於遺卷中明年菼遂魁天下文體爲之一變世服其藻鑑之精陞右贊善丁內艱歸以近世喪葬禮闕不講輯成讀禮通考一書其詳備爲古所未有服除補故官充日講起居注官明史總裁歷陞侍講學士詹事內閣學士教習庶吉士禮部右侍郎丁卯轉左侍郎一切禮制酌古準今有不便者多所釐正奉命總裁一

統志會典及明史纂輯鑒古輯覽古文淵鑑凡著作之任無不領尋充經筵講官是年秋陞左都御史飭臺綱察軍政劾罷江西河南兩巡撫及山西甘肅總兵官時方分南北黨諸御史倚乾學彈劾不避結怨益深在臺五月充戊辰會試總裁卽闈中轉刑部尙書出甫就職會湖廣巡撫張汧以罪被逮誣乾學嘗通賄事白上疏乞歸

上不聽令解部務仍領各館總裁明年復爲副都御史許三禮所劾再疏乞歸命攜一統志宋元通鑑卽家編輯總督傅臘塔疏論其子姪家人居鄉不法事

上置不問後又坐維縣令朱敦厚事敦厚坐罪當死乾學嘗以

蘇州府志 卷八十五
其父之馮死節封疆爲言至是牽連遂落職甲戌卒於家年六十四有 旨召用已不及遺疏入復原官乾學慷慨有大志生平敦兄弟之好急友朋之難尤勤於獎進後學海內之士輻奏其門名旣高而又與有力者不相下故卒爲其所逐幼旣穎悟絕人長又得其母舅顧炎武指授學益進文章原本經史旁通諸子百家開闢變化歸於妥適傳是樓藏書甲天下梓行唐宋以來先儒經解尤有功於學者所著讀禮通考一百二十卷憺園集三十卷其他著述甚多子五樹穀炯樹敏樹屏駿樹穀字藝初康熙乙丑進士監察御史時重逃人律黜遣相繼上疏力請得寬減俸滿外調歸炯字章仲

康熙壬戌進士厯官山東提學僉事葺李攀龍白雪樓爲書院拔士肄業其中表明季殉節諸生王曦和建明季奉使侍郎左懋第祠進參議官至直隸巡道呈誤歸樹敏字師魯康熙癸未進士官安陽知縣有政績樹屏字敬思康熙壬辰進士厯官廣西提學僉事爲西林縣奏請設學定額著爲令拔桂林陳宏謀於寒畯中謝病歸卒年七十駿字觀卿康熙癸巳進士選庶吉士天才雋逸坐法死

舊府志參
崑新志稿

○徐秉義字彥和號果亭乾學弟生而嶷重與兄乾學弟元文相切劘攻舉子業務闡發經傳微旨初名與儀補太倉諸生奏銷被黜援例入太學改今名康熙癸丑會試第二殿試第

三授編修乙卯典試浙江一時名士蒐羅殆盡升中允以兄弟並在華省深懷謙退移疾歸杜門著述及兄弟歿後始復被召歷陞詹事吏部右侍郎充一統志律例諸館總裁以讞案失當部議落職

命止解吏部侍郎任壬午主順天鄉試得士如浙闈遷內閣學士兼禮部侍郎予告歸乙酉

聖祖南巡御書恭謹老成四大字賜之卒年七十九所著有忠

烈紀實培林堂集子樹閔官至開化知府有循聲

舊府志參
崑新志稿

○徐元文字公肅號立齋秉義弟長洲諸生少端重有大志與兄乾學秉義倡爲古學順治己亥進士第一授修撰甚被

恩遇會江南奏銷案起奸胥竄名其中謫鑿儀衛經歷居

四年事白復爲修撰丁外艱歸康熙己酉起原官進侍讀主

試陝西所錄多單寒力學之士明年遷國子祭酒尋充

筵講官元文以養士莫大於太學極陳納粟之弊請做順治

時舊例於郡邑各庠選取文行兼優者及每科鄉試副榜送

監肄業部議著爲例在監四年規條嚴肅學政大飭侍講

經筵敷陳剴切多所啓沃進內閣學士改翰林學士教習庶

吉士丁母憂歸己未召監修明史仍爲內閣學士庚申

擢左都御史時滇孽將平元文疏陳善後之宜以安反側又

疏請除三叛虐政俱下九卿議初御史劉安國請察隱占田

畝部議凡察出者分別甄錄州縣官利其升敘多捏報累民

元文力言其弊凡欺罔害民者請加等科罪自以身總風紀
尤以澄肅吏治爲務疏劾福建總督姚啓聖妬功害能啓聖
惶恐待罪乃免又條列督撫不職四弊時捐納漸廣吏途益
雜元文再疏爭之滇南既定疏言保泰之道詞甚切直事關
八旗者人多不敢言元文獨持之嘗劾浙江副都統高國相
藐法害民得 旨察審將軍馬哈達以民間多匿逃人請
自勾攝元文不可曰必不得已當令督撫會同將軍

上從其言府部院寺筆帖式三千人求開例捐納典州縣滿大
臣以好言相勸元文力持不可卒從其議而罷二十二年大
計羣吏元文掌計典一切餽遺不敢及門是年舉行軍政請

命提鎮次第入覲以重闔寄是後提鎮悚息多請 陛見又
言滿洲漢軍官員丁憂者宜無分內外一體守制二十七月
外官丁憂不許候代治事又請申行律文居喪釋服作樂筵
宴嫁娶之禁候補御史蕭鴻鳳居喪挾妓久不回旗劾罷之
在臺三年數條上便宜知無不言不畏強禦俄坐舉湖北按
察使不當鐫三級將歸有 旨留京專領監修明史二十

七年兄乾學以左都御史遷尙書復起元文爲左都御史遷
刑部尙書尋改戶部銳意革除舊弊胥吏無所措手部中肅
然二十八年五月拜文華殿大學士仍兼翰林院事明年兩
江總督傅臘塔希忌者意疏劾元文兄弟鄉里事元文奏辨

遂力求罷以原官致仕舟過臨清權關者欲搆其罪登舟大索惟圖書數千卷光祿饌金三百兩而已家居未一年病卒年五十八元文立朝三十年清介剛直始終一節有古大臣風天性孝友篤於師友與兄乾學並好獎誘後進而性方嚴不苟言笑動必以禮每與其兄異趨所著有含經堂集三十卷子樹本樹聲樹本字道積康熙丁丑進士官編修務爲有用之學詩自漢魏以下皆詮次撰錄樹聲字實均康熙甲子舉人官中書

舊府志參崑新志稿

○彭瓏字雲客長洲人行先兄子少喜讀先儒書方言矩步爲文深沈浩博與宋德宜兄弟訂慎交社不爲馳騫聲名計順

治己亥舉進士授廣東長寧知縣邑小在山谷中當前官股削後瓏革火耗恤里排戢衙役息訟興文期月間士民翕然愛戴失郡守意誣劾去官旣歸授徒講學題所居室曰志矩齋每月朔望集諸生會文文星閣下閱數年不廢出其門者多謹飭之士巡撫湯斌重其學行常屏騶從過訪焉年七十卒門人私謚仁簡先生

子定求撰事狀

所著有孝經纂註一卷

○潘見龍字雲從吳江人聰慧好讀書有膂力能辛苦常躬耕養親順治十五年中會試念其親遂歸十八年廷試釋褐復不俟館選而歸居父喪執禮甚至母疾篤刲股療之康熙十年選授葉縣知縣招流民墾荒土命工製耒耜桔槔諸農具

教以南方種稻之法不三年而杭稻遍野斗米直二三十錢
十三年西南變起葉當要道滿漢兵至見龍盛供具請主帥
下令毋擾百姓以故大軍更番往來民不知兵丁母艱歸服
闋補閬中縣時四川新復譚彭逆黨猶時時竊發城中居民
僅數十家見龍一意撫綏流居漸復居三年擢寧海知州入
爲刑部員外郎進郎中遷曲靖知府會巡撫奏留前官候補
未得而歸尋卒子家顧字在之好讀書以能詩名著有蓮溪

遺草

吳江新志

○許定升字升年長洲人順治甲午副榜授禹城知縣決斷明
敏俗多投繯赴井以中怨家定升覽牒立察其虛實受事三

年止定真命兩案凡詞中牽連婦女者盡勾去不問邑有豪
奴高士偉李重榮等倚巨室勢橫里中定升以計掩捕立斃
杖下一時有菩薩變金剛之謠邑中丁籍前此虛增一千有
奇核實悉與減除建樂采亭於泮池南以課士潔河石橋久
圯修復以利渡者治聲大著引疾歸里力行善事與同志積
粟賑飢倡設育嬰堂鄉里稱之

通志參韓茨禹城行詩註

○吳一蜚字翼生長洲人少孤兄愉教之讀書康熙丁未成進
士授山西山陰知縣歲凶頻請緩征寬賦賑粟平糶又連決
疑獄人稱爲神丁內艱服闋補知洪雅縣時巡撫姚某方行
開墾增稅之令洪雅見徵纔七百九十四兩欲加至五千兩

一蜚力爭得減三千四百餘兩入爲工部主事擢御史糾儀
失察降補行人司副浮沉十餘年歷鴻臚少卿奉天府丞大
理少卿光祿卿太常卿擢戶部右侍郎調吏部轉左尋晉刑
部尙書時有重案株連者衆一蜚苦心消釋人多陰受其庇
轉吏部在職廉慎卒於位貧無以斂朝士賻之始克庀喪事

彭定求
撰墓誌

陸在新字蔚文長洲人康熙丙午舉人除松江教授巡撫湯
斌察其廉能特舉卓異是年江南一州七郡長吏無一登薦
者獨在新一儒官而已擢廬陵知縣不以家口自隨誓不受
民一錢每晨拜誦戒石四箴乃視事建一亭縣門榜曰問苦

息事每置投牒者於中令諦思之多自悔求息者不息乃詳
訊之曲直立判嘗裹糧詣鄉村勗民孝弟力田藹如家人暇
則與諸生講德論文士習益醇邑大治甫三年卒於官其子

鸞書以斂民罷市巷哭祀吉州名宦祠

通志參彭定
求撰墓誌

。鈕琇字書城吳江人康熙十一年拔貢生歷知項城白水縣
兼攝沈邱蒲城篆後終高明縣爲人有才略遇事能斷項城
多曠土賦不入民逃亡琇悉捐舊逋予牛種以招徠之皆復
業沈邱獄有淹繫家口歷十七年琇至三日盡出之蒲城歲
方稔盜白晝行劫琇率吏卒入盜穴捕其魁沈諸河其餘黨
之蔓延者村民縛以來盡杖殺之盜乃息高明縣界連大項

皂幕諸山多積盜琇推誠招撫盜出就撫者二十四人請於制府悉免死築室授食以安之責以巡警捍禦邑境永寧卒於官高明人祠之名宦祠琇博雅工文所著有臨野堂集及觚賸行於世

震澤新志

○吳樹臣字大馮吳江人父兆寬見文苑傳樹臣康熙十一年以拔貢生入國子監教習正白旗選知廣東四會縣撫綏有方擢漢州知州以事件上官罷歸尋復官改知潼川州久之遷順天治中轉刑部員外郎進郎中京師巨猾王五爲偷盜長淫克陰賊常殺人而擁厚貲交通諸貴人諸貴人爭庇之前後訟之者甚衆有司莫能治樹臣視事卽捕訊盡得其罪狀擬以大辟滿尙書別爲奏出其罪漢尙書及郎中以下並署名強樹臣樹臣不可奏旣上

聖祖素知王五事大怒立誅殺王五褫漢尙書王士禎職滿尙書及滿司官並鞭責流徙烏喇時四十三年秋也樹臣在刑部三年平反冤獄甚衆以勞瘁卒於官

吳江新志

○趙廷珪字禹玉常熟人中允士春孫父延先字讓卿由副貢授安陸推官遷真定郡丞時積寇高鼎踞常山趙郡間詭言受撫延先突入賊寨慰諭之見其詞色不定疾馳還入平山城申儆守禦賊猝至以有備得完擢東萊知府陞副使備兵廊延以親老遽歸廷珪登康熙庚戌進士選知林縣時編審

人丁胥吏請增丁博紀錄廷珪曰我豈以一級功名爲百姓子孫之累且開除六百餘丁行取授河南道御史請敕學臣修舉實政請禁郡縣捕盜小吏株連無辜又言子報父仇不告官而擅殺者依律杖六十蓋爲未經審抵者言如擬抵結案遇赦免死者又復擅殺是目無國憲相報無時已請分別定例使情法均盡又遇赦減等人犯旣邀再生妻孥去留宜聽自便事俱施行以艱歸未及小祥卒

縣志

○顧汧字伊在長洲人父天朗見孝義傳汧少勤學能文康熙癸丑進士改庶吉士授編修丙辰充會試同考官得人稱盛歷左中允左右諭德御試班馬異同辨

上嘉其立說平正俄遷左庶子侍講學士陞內閣學士進禮部右侍郎丁憂歸服闋特命巡撫河南先是陝西告飢詔運湖廣粟往賑而河南民獨當轉輸之役困甚

上念陸運艱難命水運二十萬石入關汧甫下車馳赴渭川酌定運費又相度水勢備述荆子關至龍駒寨數百里溪灘險惡之狀上報時運五萬餘石遂命停運河南諸郡去水遠異時歲漕二十五萬石皆赴大名府小灘鎮採辦以地非所屬固戶姦牙任意阻遏浮費不貲汧請改徵折色官爲督辦部議不允

上特從其請民始脫重累坐才力不及罷歸久之起補四譯館

太常少卿歷遷宗人府丞致仕卒舊志子楷仁自有傳

○顧藻字懿樸長洲人康熙丙辰進士由庶吉士歷官至工部左侍郎屢任學政以清正聞奉旨治高家堰堤工著勞

績歿於官 賜地嶼山予祭葬奉旨立廟虎邱花園街

春秋崇祀家述

○翁叔元字寶林常熟人憲祥孫康熙丙辰進士第三授編修文望甚著與韓茨齊名戊午主山東鄉試所拔畢世持等皆知名士歷右贊善侍講侍讀陞國子監祭酒三遷吏部侍郎充經筵講官晉工部尚書部有大工四十三案十年未銷算叔元請六部舉司官各二人分董其役半載而清乞假歸

壬申起補刑部尚書所平反全活甚衆丁丑致仕所著有鐵

庵文彙梵園詩集舊府志

○孫灝如字宏先崑山人康熙壬子副榜授蕭縣教諭陞陽信知縣仁恕化民讞獄平允遇命盜大案夜燭定爰書淚涔涔下矧民馮某強劫幼女密擒置法有鬻良馬於陽信者里蠹誣指為廐所失灝如曰良馬識途過舊里必戀其羣命牽馬過廐門竟揚尾去遂抵里蠹法罷歸杜門訓徒囊橐蕭然為人樸直醇正鄉里重之子倪城別有傳舊府志

○張登第字賡俞長洲人以順天籍中康熙十六年舉人授武進縣教諭持身端謹遇士以禮既去任士子思之以德風化

雨四字揭於振德堂祀名宦祠吳門補乘

○歸允肅字孝儀常熟人父起先明崇禎末進士官刑部主事著易聞詩通解允肅少凝重謹厚康熙己未進士第一授修撰辛酉主順天鄉試所拔皆真才一空從前諸弊刑部尚書魏象樞昌言於朝慶其得人日講官缺掌院屢立名上請未俞允

聖祖忽於袖中出片紙則允肅名也進講周易毛詩進止端詳敷奏明暢睢州湯斌歎曰講筵得正人天下有賴矣陞中允歷侍講侍讀進講讀學士少詹事與議政事持正不阿以疾告歸卒於家舊府志縣志合纂

○陳陸虬字汝翼吳江人孝子瑞裔孫少依於外祖郡城陸氏康熙壬戌成進士除浙江新昌知縣多惠政民尸祝之擢部曹旋陞温州知府中外服官清白自矢一塵不染年七十致仕歸西濠舊宅鍵戶著書有訥庵小草凝和堂詩文若干卷

江震績志彙

○陸經遠字舒成先籍吳縣曾祖始居崑山經遠年十一而孤舅氏徐元文撫之曰此吾家魏舒也因以為字康熙壬戌成進士知河南息縣訪民間疾苦廉得匪類悉置之法清釐鹽引捐墊逋賦已已行取入京授御史巡視東城左遷國子監丞累官通政使經遠謙和坦白克舉其職廉介自矢告歸卒

貧甚戚族賙之乃得葬

崑新志稟

○錢士鉉字貢南吳江人康熙壬戌進士知浙江昌化縣縣多山暴水壞田園多逋賦士鉉至計以新墾者補其額條請於當事奏行之且令他縣以為法擢知武定州鄰邑有盜出沒州境陰結豪右為囊橐士鉉訶得其主名以法痛繩之豪右震懾盜亦遂息未幾歸士鉉居官多惠政而律已甚嚴歸無餘貲門宇蕭然布衣疏食中年喪偶鰥居以終

江震新志

○張映葵字勤若號筠亭長洲人弱冠補諸生從彭瓏吳愉遊有文名屢試不售以拔貢選天長教諭訓諸生以讀書敦行旬課月試次第甲乙歷寒暑無間一時來學者甚眾嘗攝縣篆有廉辦稱以老乞休不及歸卒將葬天長門生有徒步數

百里來會葬者

徐陶璋撰傳

○張孟球字夔石康熙乙丑進士授山東昌樂縣昌樂地瘠民貧孟球省徭役課農桑邑有起色入為工部主事存歷郎中出視雲南學政著廉明聲補河南糧驛道陞按察使護撫篆蘭陽縣有白蓮教煽惑愚民事泄孟球檄杞令甯佑扁城嚴索盡獲其黨有司概擬作叛孟球以愚民被誘與謀逆異止治逆劄偽衙者罪南陽守與遊擊某有隙守以賭博責營兵合營大噪縛守圍總兵署孟球但嚴令守禦得倡亂七人其餘自首者免兵心乃定人稱其得大體內陞左副都御史歸

年八十卒子學庠紹賢皆己丑進士應造乙未進士入翰林
企齡戊子舉人景祁癸卯舉人五子並登科甲吳中稱爲盛

事云

長洲
縣志

○蔣陳錫字文孫常熟人伊長子康熙乙丑進士除富平知縣
擢禮部主事監督海運倉除糧艘篷蓆銀以紓丁力遷員外
郎授濟寧道佐理河務革河夫供給各衙門薪柴弛湖陂葑
菱水利之禁厯天津淮徐道遷河南按察使部有老瓜賊雜
平民中戕賊行旅陳錫嚴捕窮治絕其根株道路以安陞山
東布政使晉巡撫山東鄉試解額舊時六十名疏以爲先聖
舊邦不宜居江西福建下因得廣至七十餘名長蘆鹽使請

增引臨清關使請添設收稅所並疏陳其不可事俱不行久
之擢雲貴總督滇南土酋常應運者有叛萌興兵擒斬應時
撫定礦廠或硎老山空而課額不減疏請礦旺則開礦衰卽
止隨收隨解勿爲定額常德至鎮遠險灘數十處怪石岸峇
倡屬捐金鑿平之又旁開溪路以避灘險奉 命勞軍衛

藏未至卒陳錫天性孝友接物和易待故舊有恩義居官不
爲崖異有 御賜清慎勤及敬一堂額子漣河澍浩漣字

檀人康熙己丑進士改庶吉士授編修時征策妄阿拉布坦
漣捐橐駝佐軍有 詔褒美進中允督學河南輯中州視

學記略遷侍講請易 文廟大成殿以黃瓦又請做朱子綱

蘇州府志 卷八十五
目義例纂明史綱目累陞太僕寺正卿奏添牧廠二十四處
馬駒蕃盛以年老乞歸卒年八十四洞字愷思康熙癸巳進
士授工部員外郎歷郎中擢雲南學道革棚規除苛令以父
任總督迴避去任奉

命赴軍前辦事至陝補涼莊道時軍出七路皆集城外洞徙民
入城捐資賃屋以棲兵兵民皆安調西寧大軍西行由大通
河洞倡建大橋以濟軍行羅卜莊丹津者番夷渠魁也涼莊
生熟西番連結蠢動洞以涼莊五郡汛兵俱赴戍城中空虛
乃疾馳至莊浪料簡精壯千六百人造給鎧仗火藥又團練
涼州永昌鎮番古浪各村堡得六千餘人聲勢壯盛大將軍

倚之檄委統領官兵土兵會同進勦副將以下咸聽調雍正
元年十月誓師於定遠城分兵爲三道並進轉戰於棋子山
山爲賊之門戶勢陡險洞佯若仰攻而別選銳卒遠出其背
遽奪其山梁前後夾擊殺賊無算餘衆遁入鐵包城城四面
峭壁前有仄徑後臨大通河洞兵攻其前礮轟其後殲賊之
半於時羅卜莊丹津進逼西寧分躡甘涼諸處番族應之洞
檄涼屬鄉勇捍禦自移師武勝爲聲援賊遂遁猶恃阿損一
族爲凶暴乃統兵銜枚躡其插帳處出不意殲之遂搗其巢
阿損平諸番帖服會蘭撫綽奇劾洞虧帑

上嘉其功置不問陞山西按察使轉布政使臨晉民抗糧負固

方調兵往勦洞詣其處曉以禍福民皆釋械誅首惡六人餘釋不問奏免大同十一州縣重出草束腳費一萬二千兩並免馬邑縣邊地積欠地丁萬餘兩尋以侍郎銜往肅州協辦軍需念籌邊必先裕餉莫善屯田體訪河道有高臺張掖口外數處皆宜種植黍麥引黑水資灌溉可闢田千頃繪圖以奏報可於是開三大渠列斗門數百以引水而蓄洩閘壩大小橋梁復以百計閱五月工成留屯二年墾田三十餘萬畝言者以洞侵帑誤工呈吏議大吏交章雪其誣洞已卒澍字音傳官長蘆運使管天津關以廉幹稱卒於官浩字廉叔官德安知府洞子榆字玉材有至性母病日飮之五年得愈狂

寶坻知縣澍子柟字廣蔭九歲能文雍正庚戌進士官工部

主事

昭文志參陳世倌狀蔣櫬志銘

○張燠字曠如長洲人以諸生就鑲藍旗官學爲教習師選河南登封知縣登封自明季遭寇亂比歲不登民多失業燠至革除私斂招徠流亡督之耕種莅官五月大修學宮會諸生明倫堂講萬物一體之義復嵩陽書院導諸生以程朱之學自縣治達郊鄙立學舍二十一所課諸童子月再集民讀法置善惡簿爲勸懲閒策驢厯民舍問所苦有小爭訟輒從阡陌間決之俗好訟燠舉善士爲鄉約俾行化導俗爲一變路不拾遺獄訟日尠衙胥閒則操耒耜爲農開萼嶺二百里復

輓轅路建古賢令祠修舊令鄢廷誨墓廷誨崇禎末守城抗賊死者也康熙二十一年自春徂夏不雨墮囚服繫頸暴日中拜表引罪步登少室東峽汲泉水反獄廟俄而雨大注以卓異薦遷廣西南寧通判民遮道痛哭既去立四祠於四鄉肖像以祀榜曰天下清官第一旋遭母喪服除赴京師卒於旅館年五十六

彭紹升良吏述

○湯傳榘字子方長洲人康熙戊辰進士除清流知縣下車盡革里甲陋規驛遞悉歸官辦夢溪芹溪炭山羅村諸遠鄉歷年抗賦官吏無如之何傳榘單騎親往諭以大義眾遂感服積逋一清居六年惠政甚多以母老力請終養既歸從學者

眾評選制義重編明儒四書大全與前所纂四書合參春秋講義並行於世以侍母疾積勞卒年八十五

彭定求撰墓誌

○陶元淳字子師常熟人少英敏過人於三才萬物之理古今因革利病無不講求精審志欲有為於當世康熙戊辰成進士對策請減東南財賦詞極剴切主考抑之除廣東昌化知縣始至逢歲旱徒步禱峻靈山雨立降縣有浮糧賠數百年力請蠲除不能乃勾稽本末作浮糧考姦民隱占飛洒愚民重困乃行清丈法兩年始竣作魚鱗冊剷除公私陋弊作會計經費錄創立墟市招流亡集商賈禁戢土司加恤窮黎時行村隴間問民疾苦藹藹如家人父子海外武弁橫行崖州

尤甚元淳署事三月盡伏其罪狀雖遇赦得寢而將吏由此斂戢以勞卒官邑人尸祝之所著南崖集四卷廣東志十卷明吏傳數卷其制舉文風行海內學者方之金正希陳大士云陳志長子貞一字改之一字駿文康熙壬辰進士由庶吉士授編修不樂仕進以養母乞歸雍正初被薦與修明史稿具復乞歸乾隆初就職半年休致歸居鄉凡邑中利弊必與當事言之常昭初分貞一按全邑大勢以東西分治條七議上當事疆域以定時議濬白茆河貞一言宜濬白茆之裡河至北港口導之使歸徐六涇入海建巨閘以拒潮則省費而功可久其他有益桑梓知無不爲工制義兼工古文徜徉里中

以卒著有虞邑先民傳退庵文集若干卷貞一孫廷墀廷堦

同舉於鄉皆任教職

舊志參常昭新志

元淳次子正靖自有傳

○張孝時字嘉錫吳縣人康熙辛未進士選庶吉士改樂城知

縣濬浚沙諸河故道延袤四十餘里列植榆柳以固隄防邑之水患遂息在官二載政績特著以巡撫薦及九卿保舉擢知寧州撫綏疲瘠民日休息又疏濬州西天池以資灌溉連歲大稔州有白狼噬人孝時爲文牒城隍神狼遂不出居七年以疾乞休未就道而卒弟孝揚字嘉名少與兄友愛康熙辛酉舉於鄉五試禮部不第改授旌德教諭息爭訟新學宮勤文課作勸戒十二條以教化爲己任爲一時校官中所僅

方嚴轅憂之勸祖諱散其家財兄輪不從乃謬指隸洱海衛者為已族人皆怪之後監黨獄起諱與禮俱死一家無脫者

獨轅以嘗附尺籍免兄子雲霖俱幼孤轅保護甚至復變姓名潛入都下竊祖叔遺骸

潘程章曰莫志作祖叔蓋指諱與禮也徐志不詳改叔為父且前已

云父瘵死矣何自相矛盾耶歸葬之屢冒法禁幾死建文元年赦歸痛念

家禍不御酒肉者數年家失火延及母寢轅躍入火中抱母

出鬚眉盡焚轅少從張適易恒游老而好學為詩文有理趣

卒年七十七門人私謚貞孝先生

姑蘇志參松陵文獻

陳晉字次翁吳江人元末偽吳竊據其父坐作詩謗訕論死晉請以身代父子爭死不決王者謂代父者孝代子者慈慈孝

之人安肯訕上遂皆免之父尋病死既葬猶朝夕哭至失明

洪武中晉妻家坐藍玉黨逮治事連及晉棄家遁去以存宗

祀後赦歸孫讓亦善事親鄉里稱為世孝

松陵文獻

范從文字復之崑山人之柔六世孫父原良明初為湖州府推

官客死藁葬從文方弱冠匍匐至潮求攢不得日夜號泣俄

大雨頽其封湧骨出果有識焉乃以歸葬洪武中以國子生

擢監察御史改戶部主事奏免株連盜倉罪百餘人俄為同

官所陷謫役莊浪頃復追戍金齒徙廣南永樂初以薦起為

金華訓導歷東安金鄉三學致仕歸年八十七卒所著小學

章詰宗牒補遺復齋集若干卷

方志

始登第中遭顛踣浮沉又十餘年在大理時不肯碌碌署紙尾九門提督陶和氣借通倉盜米案鋟入其所怨檀張三者欲置重典虞惇力持不可卒從末減內務府二格殺無罪者二人傷一人移其事於塾師徐天榮天榮口吃不能自白承問者考竟成獄虞惇方移疾上書本寺少卿邵觀歷指其可疑狀力疾起出不意執二格訊之遂吐實天榮得釋典試楚蜀皆稱得人其學根抵經史貫穿三通之書爲文典實正大所著詩經質疑詩文集共若干卷

陳志

○顧楷仁字晉裴長洲人宗人府丞沂之子生而端靜無執袴之習康熙庚辰進士癸未以行人考選擢雲南道御史協理

河南道事丁父憂服闋遂不復出家居二十四年年七十一卒楷仁在臺每事盡職其稽察錢局也商人辦銅不以時至或倡收廢銅以資鼓鑄之議楷仁知其弊執不可議因中止其查通京兩倉也巡視甚勤適京倉火災單騎往救指揮得宜及奉處分獨免於議五城事繁楷仁巡視南城剖決明敏夜巡非漏盡不歸一時奸宄屏跡事關民命尤加詳慎每當秋朝兩審取各省揭帖摘錄小冊自隨少有出入輒力爭駁正時趙恭毅公官總憲曰爲後生可畏其立朝大略如此性甘淡泊每戒子孫禁紛華絕奔競嘗曰俗奢示儉吳下尤甚不必問外論云何也其家範可法又如此

王峻撰傳

○許穀字詒孫常熟人父豐有孝行穀少攻經義風發泉涌推應舉利器康熙庚辰登進士改庶常出知垣曲縣地爲僻邑訟庭清簡穀以師道自任口講指畫生儒環侍迄無倦容文風遂冠全晉士人稱爲許夫子康熙乙酉分校晉闈所舉皆雋才濬東鄉沅河使旱地俱成腴田民賴其利稱許公渠丁外艱歸囊橐蕭然罕入城市列祀垣曲名宦政績載山西通志子朝字光庭幼工詩古文乾隆己未成進士授廣西懷遠知縣陞太平府通判以累罷起補山東德州通判謁鄉賢祠黜明嚴嵩黨楊順楊乃害沈鍊父子者也衆慙之輯州志若干卷草書得十七帖之法著有紅橋古文集十六卷紅橋詩

集四十三卷

縣志

○費洪學字巽來吳江人康熙庚辰進士授博野知縣北俗健鬪輕死好賭博多土娼夫婦常相棄而豪猾尤爲患洪學初至首按不法武舉魏某正其罪其餘一切以大義開諭之犯者法必行俗遂變秋糧加耗民戶獨畸重洪學裁之使紳民畫一社倉穀之貸於民者歲入息有常例洪學量減其息之半歷三載卒於官吳江新志

○蔣廷錫字揚孫常熟人伊仲子少穎敏折節向學負才名康熙己卯舉順天鄉試癸未下第 特賜進士選庶吉士入

直南書房尋授編修遷贊善歷侍講侍讀少詹事擢內閣學

蘇州府志 卷八十五
士充 經筵講官雍正元年遷禮部右侍郎尋調戶部四年
晉尚書主順天鄉試丁母憂起復視事六年拜文華殿大學
士仍兼理戶部事加太子太傅充

聖祖實錄及明史總裁官庚戌典會試

特恩加一等輕車

都尉世襲卒於位年六十四當廷錫內直時

聖祖方稽古右文

命儒臣編纂羣書每奏

御輒付勅

校博學精敏同輩咸推讓

車駕所至皆扈從備顧問佐禮

部時凡上

尊諡廟號

山陵升祔

郊壇配享諸鉅典廷錫諳練典故參考經籍議上多稱 旨

及爲戶部筦三庫與怡賢親王協心一力剷除宿弊部務爲
之肅清明習吏事案牘必親裁西陲用兵軍需調度機政填
委廷錫勇於任事應時立辦無少瞻顧以此最被 恩遇所

賜御書扁額曰黼黻絲綸鈞衡碩輔萬幾賢輔他賞賚

不可勝紀及屬疾醫藥勞問之使相望於道病狀日再馳奏
旣歿以聞

世宗震悼爲輟朝遣大臣臨奠內府庀喪事加祭一壇諡文肅
所著詩有青桐軒集破山集皆少作通籍後多未編錄尤工
寫生神妙與宋元人爭躅性豪爽俸賜數萬金周恤親舊知

交不少吝 賜第外田宅無所增歿後人多思之

張廷玉撰墓誌

子溥自有傳洲字履軒由蔭生官至山東巡撫

○吳士玉字荆山吳縣人康熙丙戌進士選庶吉士授編修陞贊善歷侍講侍讀提督順天學政晉講讀學士 武英殿總裁雍正元年擢內閣學士充 經筵講官入直南書房甲辰主江西鄉試教習庶吉士晉戶部右侍郎兼一統志總裁調工部尋解任令在內閣學士裏行復歷禮刑吏三部侍郎陞左都御史進禮部尚書年六十九卒 賜祭葬謚文恪士玉以文學見知

兩朝服官三十年和平謹慎始終如一少攻舉子業爲諸生試

輒冠儕偶文譽籍甚所選篋中集先後十餘種盛行一時詩

宗韓蘇有蘭藻堂集

舊志

○陸賜書字宣穎長洲人肯堂之子康熙丙戌進士授禮部主事擢御史耿直敢言嘗奏裁汰總理王大臣尋出爲陝西莊涼道調四川川東道布政使司參議

世祖命仍兼御史銜賜密摺奏事在川十年歷權藩臬頗著廉聲乾隆四年以病告歸卒於家子元鼎官河南商城固始知縣四川簡州山西應州知州

○蔣杲字子遵長洲人明副使燦四世孫康熙癸巳進士歷戶部郎中廉敏勤慎爲諸曹最出知廉州府寬厚持大體而剖

決明鏡庭無滯獄上官皆重其才守輒檄攝鄰郡事所泣俱有聲以呈誤罷用薦監修海寧海神廟工垂竣而卒杲少從何焯游文學博瞻兼長吏事未竟其用人多惜之通志子元益自有傳

○趙成穠字德培吳縣人康熙戊子舉人授內閣中書歷戶部員外郎兵部郎中考選御史六十年三月大學士王揆以請建儲奉嚴旨切責時科道十三人亦各疏上請成穠與焉並謫戍口外軍臺成穠以雍正三年卒於歸化城舊志

○朱永字觀成崑山人康熙戊子舉人由內閣中書授雲南永昌府同知甫下車見野多暴棺集耆民勸諭速葬捐購隙地

為義塚其俗婚娶論貨財貧者多愆期永諭之以禮自是婚嫁皆及時為巡撫楊名時所重檄署府事地多瘴民有瘋疾恐沾染輒生理之永令患此病者悉舉報違者罪其子孫及地鄰其風遂革野象蹂躪禾稼永為文牒告土神象皆帖尾去民為立祠頌德罷歸卒崑新志

○劉澤乾字玉如崑山人少師事平湖陸隴其敦內行康熙間以貢授旌德訓導廟宮逼通衢泮池久淹澤乾為設櫺星門築圍牆歲終質敝裘以償工價旌俗喪三年則破櫬別貯骨小棺以葬男女無別為請於上官立碑永禁邑令周某以逋穀二千石下獄將死為募償之更募金遺其子以去為諸生

時歷試必冠儕偶在旌德問字者衆闢地築舍舍之陶成甚
多年八十卒於官

崑新志稟

○陳鴻熙字賡載長洲人康熙辛卯順天舉人選授廣東樂昌
知縣雍正元年調順德縣順德多豪猾好挾令短長鴻熙至
豪猾斂迹鹽務舊屬商辨會總督孔毓珣奏請官銷部議允
行而順德尤積弊難理乃爲定官價平其直更多設槩船巡
海口於是私販罷而引通丁未歲飢勸富民捐賑自捐俸以
倡之擢廣州府理彜同知陞韶州府知府韶州多深山密箐
民彜雜處彜獷悍而貧時出爲盜於是設法給資督以農務
其不率者繩以法彜人感德畏威不爲患兼管太平橋鈔關

按冊征稅吏不容奸十年擢兩廣鹽運使粵中竈戶苦稍食
不足額將餘鹽減價私賣故夾帶者多而引鹽壅滯又商人
苦餽遺多漸失殷富輸餉屢後期鴻熙卻商人餽遺更按額
量加竈戶稍食於是引鹽銷而餉如期三署臬司昭雪冤抑
甚多會於讌會觸上官之忌忌者妄以私貨征息密奏

欽差侍郎吳應棻等至粵鞠理衆商號哭稱冤據情人告

命往雲南以知府用乞終養歸奉母居杭州五年返蘇以
疾卒年五十五子樹華能詩精於左氏春秋

宋邦綏撰傳

○程國棟字玉亭吳江人補烏程諸生康熙五十二年舉人歷
嘉定鹽城沛縣知縣丁父憂服闋補范縣調滕縣尋罷去國

棟自少留心經世之務凡係民生休戚知無不爲試用江南嘗運穀賑宿遷在嘉定率先捐米煮賑全活六十餘萬口民感其德爲繪賑濟圖會

詔以大理寺汪滙等理淮陽水

利國棟陳議去壅塞築堤壩宣洩海道灌溉田畝皆切實可施行滙等據以入告疏導七邑至今蒙其利所著有嘉定鹽

城兩縣志詩文集若干卷

江震續志橐

○蘇本潔字幼清常熟人沂水知縣翔鳳之孫康熙癸巳舉順天鄉試雍正五年以保薦試用閩省署晉江令戎帥縱卒虐民擒治不少貸幾爲所搆旋得直調知侯官縣值歲祲首請題留江南漕米十萬石運閩接濟行順莊滾催法民便而課

足閩省至今通行焉七年擢福州知府引見時條陳便民四事

上顧大學士曰閩中州縣第一人言不虛也賜賚有差抵

郡大吏倚如左右手凡十郡疑獄必令覆讞手批口答判決若神將題陞臺灣道以母老力辭未幾得疾請告弗許請調簡許之移守興化聞母病驚悸疾遽革本潔體貌豐碩美鬚髯善談論聽者忘倦詩有黃楊草少攻左氏傳撰疑義一卷論者謂可與顧亭林杜解正並傳

邵齊然狀

○尤秉元字昭嗣一字貽孫侗之曾孫康熙甲午舉人出知四川樂至縣邑中文廟圯壞鐘鼓不設爲之修葺城垣傾頽啓

閉不時爲之繕完舊有鹽井并廢稅存力請上官以除積累
山田苦旱灌溉無從命築塘堰以資蓄洩社倉在城民運艱
苦分建四鄉以均道里之遠近而使冬夏之出納同時稱能
吏者未之或先生平節儉寡慾廉靜自守三十喪偶獨居二
十餘年旁無媵侍公退焚香默坐閒賦小詩見者疑爲枯禪
忘其爲官人也居鄉不與戶外一事乾隆十四年以疾卒年

六十有詩文集若干卷

沈德潛
撰傳

○邵世泰字季醇常熟人曾祖世茂字羽萬順治乙未進士韶
州推官世泰康熙甲午舉人考授內閣中書陞侍讀歷刑部
山東司郎中東省有爲父仇殺死怨家者已照殺人律定擬

世泰駁之曰齊襄復九世之仇春秋大之今子復父仇情既
實應減等

世廟是其議遼陽劓菎者不問首從概配煙瘴至則多死世泰
請以財主及頭目罪如律從犯概減一等從之擢貴州平越
知府值苗疆兵燹之後氓俗凋敝前官請發籽糧千石大吏
以軍需不許世泰力請給三千石歲亢旱奉檄採買屯餉復
力請寢其事世泰居官十三年敝車羸馬衣裘僅蔽體卒後
宦橐罄如苗民裹糧昇觀至鎮遠登舟始去子玉瓚字廉夫
諸生父歿承志不受賻萬里扶櫬歸克盡喪禮性謙謹好讀
書嘗纂歷代沿革輿地說年八十三終

家述

○王錫字覲揚吳江人康熙五十六年舉浙江鄉試選江寧縣知縣有同選人賀曰今歲值蘆洲清丈有茶果銀千金可得也比之任丈洲悉革舊規祇納其應完者爲正供調豐縣縣瀕河河工歲徵稽料官多殃民肥已錫託以陸路艱運辭謝之永准爲例時值水災理荒政全活者無算尋以呈誤歸里侍養嫡母能得其歡居恒以敦倫睦族爲務輯族譜建宗祠王御史景亮明季殉節暨俞韓武琛兄弟遺櫬並滯淺土錫爲醵金葬之性好詩酒卒年七十一有棲碧堂詩集藏於家

江震續志稟

○葉士寬字映庭吳縣人康熙庚子舉人雍正四年試取內閣

中書以知縣用任山西定襄縣八年遷沁州知州其爲政善知民隱捐棄煩苛不假吏胥手署潞安知府除諸稅之無名者復四門集以便商人治行爲山西最十二年大計以薦入朝 賜蟒袍擢紹興知府有士爲情民所殺衆士譁將罷試士寬在三江聞信飛騎至數言剖解試如初浙西海塘被風潮所壞堵築三月而完乾隆六年移知金華府凡三年多惠政既去金華人思之爲立生祠四年授杭嘉湖道嚴保甲之令盜賊屏息明年移金衢嚴道衢州地勢高西安龍游諸縣築壩蓄水以溉田商人入山伐木私開壩行水日涸乃嚴其禁民稱便八年移寧紹台道釐關政修戰艦巡歷外洋

雖險遠必至紹興被水蕭山諸暨民多挾衆詣縣求食巡撫聞而惡之不欲賑士寬往視還白巡撫言訖痛哭巡撫心動遂得賑嘗議修水利欲復紹之鑑湖寧之廣德湖興灌溉之利會去官不果著浙東水利書冀後有行之者丁父憂歸遂不出平居孝友學問淹博卒年六十有七

彭啓豐撰傳

○歸宣光字念祖號杞懷常熟人允肅孫宗敬子康熙庚子舉人授內閣中書遷侍讀擢御史轉兵科凡所論建大率謹廉隅杜積弊不爲苛刻近名之舉奉命巡察湖廣請墾鄖襄各處及苗徭谿崗可耕曠地給民牛種前後共墾水旱田十八萬四千二百餘畝民賴其利以新闢永綏苗地米少山

水險迅苦於輓負兵民日用不供請於藩庫撥銀二千兩交官採米運倉平糶以備不繼又陳沿江沿湖水汛塘房旣慮水患移居高阜兵隔水次不便巡警請添巡船往來駕駛以備倉卒擢鴻臚寺卿右通政乾隆初進通政使己未充殿試讀卷官故事非曾任翰林官不與宣光以乙科三任其事陞戶部右侍郎歷吏兵工各部遷禮部尙書署吏部調左都御史終工部尙書辛巳

皇太后七旬萬壽

高宗集諸王大臣年至耄耄者爲九老之會并繪以圖宣光名在第六御製詩三章賞賚最渥明年卒於位年七十二

諭賜祭葬

賜諡昭簡宣光性謹恪遇事和平練達

未嘗矜已傲物亦不肯詭隨人敝歷中外多所建白晚年創

立常昭會館里人至今至京者有所依庇史貽直狀子夢燧字寶

傳以舉人歷官陝甘江西知縣擢興安直隸州精於吏治所

至有政績次熙字輯之能書任山東鹽運司經歷次朝煦次

景照次恩燕自有傳縣志

○徐德秩字敘九崑山人乾學孫樹穀子官廣西象州知州除

糧米陋規丁銀火耗吏民悅服州多重巒深箐民易嘯聚來

賓縣西鄉里獍賊覃扶壽竄匿山谷象州與來邑接壤民多

脅從德秩悉罷捕卒諭以向善盜稍稍解去乃單騎入賊巢

擒扶壽盜悉平因條列開墾法令民自擇曠土假以籽種田

器寬其役緩其賦民爭為農粵俗剽悍輕生好復讐睚眦之

怨以刃相加德秩諭以周官之言風自此息調新寧州修其

城垣歷署宣化隆安縣察冤獄捕大猾歷陞梧州知府三江

滙聚城外民廛多於浮簾架屋每歲江水驟發卽無寧處乃

請以內外隙地聽民建造竹房永免其租民賴以安治梧三

年戶口歲增固圉寂過者咸謂有賴川之風建府學明倫

堂修文廟置十三經於中更考古制度為祭器春秋行釋奠

禮改設傳經書院擇邑之秀良誦讀其內延耆儒為山長人

文之盛彬彬乎與江浙頡頏在粵十五年宦橐蕭然卒於官

顧貽祿
撰傳

○徐德裕字啓佑崑山人乾學孫樹敏子由監生援例授曲靖州判陞烏蒙府鎮雄知州時方改土歸流州府皆草創雍正八年秋祿萬福反破郡郡屬五其四已陷賊黨副刀易租等嘯聚近山謀襲州城德裕令把總劉承印率兵出屯要口分所練鄉勇二百助之以所留二百人設伏兵於城東西而身率壯丁守城承印來告賊將乘夜劫營德裕撤所伏鄉勇并率壯丁人持兩炬前行賊遙望火光燭天謂援兵大至退走更選銳卒逐之遂獲副刀父子及其黨數十州境大定錄功加三秩是年冬提督哈元生克復郡城制府檄德裕視篆旋

改烏蒙爲昭通在郡八年繕城堡招流散烏蒙沃壤民不知藝稻募農師教之招迤東十郡無業之民資其日用使就耕開渠導龍洞山泉以灌田便汲初至之日石米直白金四兩迨去直僅二兩乾隆四年遷山東鹽運使坐同官事被劾事白歷淮揚道副使陞湖南按察使卒

崑新
志彙

馬燦 子重 孫鈺

吳其炎 子至愉

蔣溥 子樞 賜棨

陶正靖

錢望 子曾發

屈成霖 子曾發

沈宗湘

王荃

錢之青

宋邦綬

龔克庸 父大潛

席雍 子紹元 紹凱 弟襄 從子紹容

周範蓮 子光鏞

李治運

趙森 弟貴棻 子同翮

蘇宏遇

何炳奎 子南璋

吳至慎 子鍾僑

趙宗堡

錢以銓 父鵬翔

唐瑩 子洪緒 惇緒

周元理 弟元瑛

顧元揆 父祖望

蔣元益

方懋祿

葉鑒

邵齊然 兄齊熊

顧德懋

沈棻

錢汝楠

葛修齡 父李琦 子峻道

席夔 子維世

蔣果

王鶚 子若沂

李章培

郭廷贊 弟鏞 廷采

宋宗元 父匡業 子兆元 調元

蘇州府志卷第八十六

人物

宦績十一

本朝

○王琛字匪石常熟人少勤學能文章入京師客遊公卿間凡
編纂諸書未嘗不稱 旨康熙五十一年 詔值武英
殿五十九年授四川內江知縣雍正元年年羹堯總督川陝
欲引琛自助將奏移陝西琛固辭及年敗得免於臯攝灌縣
嘉定府屬之洪雅縣與雅州府治相近中隔崇山轉運者必
紆水道數日始達舟行激湍覆沒者衆時方用師西邊上官
檄琛通餉乃按驗地圖鑿山開道旬日功成自洪雅達雅州

不過百餘里人皆便之五年署榮昌縣脫良民被誣爲盜者十四人在任八年遷紹興同知未行以決罰不如法被議落職歸九年以蔣文肅公薦

一年引見

命往廣西以知州試用權金州州有農婦

孀居田主迫淫之婦不從自經死前官不爲理琛至聞其事出口土中按驗得實抵田主於法而旌其婦州人大悅乾隆

元年授永安再調永康以老病乞休卒於家

彭啟豐
撰傳

○宋壽圖字南衡德宜孫大業子九歲能作擘窠大字少孤外家王氏爲援河工例得通籍雍正五年選永平府同知奉檄查北五府驛站時夫馬多缺額輒臨事雇募強取民間畜以

應壽圖至先覈夫馬實數次革濫應折給之弊時天津初設水師營造戰艦募工於浙三月集事且令教肄津工其後歲修戰艦不煩遠募京畿官田數百千頃豪猾倚勢爲奸貧民不得佃壽圖盡徹去之尋調真定府同知題授知保定府十三年擢清河道旋調通水道通永木稅向無例榜至是設之視太重者減之量汰額征充飯銀者以益課商民賴其利嘗閱視河工以爲治水之道在蓄洩得宜潮白温榆諸河之水由密雲順義經北運河以達天津白溝兩淀之水復從千里長隄合子牙河由天津入海聚多洩少鮮不橫潰因於筐兒港青龍灣二處詢耆老具方略疏洩異漲加築壩工乾隆二

年六月大雨河西務北隄且潰壽圖急募民築新隄躬負土
爲倡畚鍤雲集甫成而舊隄潰是秋復苦澇寶坻諸村尤甚
壽圖核災民以十三萬戶口報上官嫌其多壽圖力爭乃許
調往雲南補迤東道督濬金沙江勞績居最十二年金川用
兵往軍前總理臺站兵罷乃旋尋有疾卒於官年五十一後
半月奉命遷按察使已不及聞矣子英玉別有傳

彭啟豐
撰傳

○嚴有禧字厚載常熟人虞惇之孫雍正癸卯進士授河南涉
縣令時總督田文鏡政尙嚴厲屬吏望風懾憚有禧強直敢
任事擢知山東濱州田故與東撫岳濬不相能陰屬有禧察
動靜有禧曰吾豈能譖人以求進乎久之竟無所白遷萊州

知府擢登萊青道調糧儲道丁內外艱服除補湖南岳常澧
道民隄湖旁涸陂爲田水勢盛輒潰漫而民以墾闢請者相
繼兩院下有禧勘狀有禧言此皆游食好事之徒欺隱愚魯
恣爲科斂及至決溢告災求賑與胥役表裏爲奸因條上其
弊圍湖之議遂格澧民蕭六表告所怨劉太玉譚如山及諸
生車禹殿等有逆謀軍門某聞知遽捕繫諸生等會將肄兵
於澧民訛言兵至相率驚竄有禧察其誣立爲伸雪縱遣而
歸馳書帥府止其兵澧民乃安擢河南按察使調貴州以疾
解職疾平復爲河南按察使調湖南坐累鐫級歸有禧持風
裁容止威重及居憲司綱紀肅然與兩院平議庶政進退屬

蘇少府元 卷八十一
吏正色諍辨無所回撓而讞鞫之際更務矜恕常恐枉縱人
皆憚其剛而服其平少貧困及仕居處儉約歷官三十餘年
家無贏資生平不妄取與然能敦氣誼周困窮修葺祠墓編
纂宗譜刊刻其祖太僕遺書所著有延綠存稿東萊紀略淫
刑兩鑒等書行世

邵齊燾墓志

○王景獻字鶴隨崑山人父喆生見儒林傳景獻八歲卽能解
經作墨銘登雍正癸卯進士授廣西懷遠知縣甫抵任奉檄
會行團練先是令每出巡假公費苛索閭里或激怒苗獍仇
刦益熾景獻於馬前嚴飭賫牌去役毋許一毫派累躬至各
鄉鎮紳矜集處及獠獍所居宣示撫慰苗民歡忭撰新詞吹

蘆笙令苗女聯袂踏歌以頌攝融縣事縣有鬻販婦女巨案
涉柳城羅城凡三邑計七十八人丐紳士居閒行重賄來貸
景獻怒斥之渠魁皆伏法未一年政聲大起念父母登耄耄
乞養歸父卒遂不復出生平邃於學問於詩禮三傳尤反覆
貫串云

崑新志稿

○周廷燮字贊宸長洲人雍正甲辰進士授庶吉士散館改都
察院經歷陞刑部現審司員外再陞禮部祠祭司郎中奏請
蠲免米稅奉 旨俞允出爲陝西延綏鄜道地當套口密
邇邊城監收兵餉管理鹽茶素稱繁劇廷燮以鎮靜治之夷
民和協廉潔自守以病告歸蕭然襤被囊無一錢吳中爭延

為弟子師課徒十五年奔走於風雨赤日中非公事不乘肩輿束修所入與諸弟共之對朋友煦煦如春風之和蓋縉紳

中之鉅人長德云

長洲新志

○范璨字電聞號約軒震澤北麻人入秀水縣籍登雍正二年進士選庶吉士累官至湖北巡撫工部侍郎乾隆九年璨奏每歲青黃時米價昂貴之地有司應諄諭蓋藏充裕之家令其附近村落陸續糶賣以平市價俾窮民得沾實惠

高宗允行之尋告歸二十六年至京祝

皇太后萬壽時

高宗以大臣年高者為九老會在籍九人璨與焉

賜杖

賜遊香山三十年

高宗南巡

賜耆英介景扁額人咸榮之璨少有詩名工且

敏有枚馬之長著有樂志堂集

江震續志稿

○彭啟豐字翰文鄉舉之歲芝生庭中故自號芝庭元和人侍講定求之孫雍正丁未會試第一 殿試卷列第三

世宗親擢第一授翰林院修撰旋直 南書房七年充河南鄉

試主考官十三年充江西鄉試主考官時江西官生止二十

九卷例中十卷文多淺拙裁去四卷以民卷足之乾隆元年

充山東鄉試主考官三年遷翰林院侍講時許近臣奏進經

史講義啟豐所上多切於治體嘗論月令云行爵出祿必當

其位所以使之當位者有三一曰尊宰輔以崇其體二曰卹羣臣以達其情三曰久任使以專其職明良之世君不疑其臣臣自不欺其君其左右大臣必有耆艾碩德從容朝廷之上汲引善類扶植忠良所當布以腹心隆其禮貌故曰任賢勿貳至小臣者大臣所自出宜優卹而厚期之其厚期之者尤在作其敢言之氣則耳目廣而人才益厲若夫人之才器不能相假故虞廷兵農禮樂各有專司一官終身不易其任倘甫履其地旋改而之它叩以政務必茫然莫辨況民社之官責成非細宜仿古者增秩賜金之制俾人與官相習庶明作有功之效可得而幾也又嘗論玉藻云動則左史書之言

則右史書之蓋人主一言一動卽安危治忽之幾所由判雖欲不日愼一日其得已乎又嘗因論通鑑宋雍熙二年求遺書事請廣搜宋元以來諸儒遺書切於理道者呈進傳刊以惠士林

詔如所請六年充江西鄉試副考官路過宿州時方被水還朝具奏章下督臣察治之江西學政某諂事大臣以屬官自居啟豐奏言學臣職在表率士子宜得端方清正之人若乃逢迎媚說相習成風所關匪細宜加禁飭下部議行七年出督學浙江歷遷通政使左副都御史內閣學士兼禮部侍郎刑部右侍郎領學政如故任滿還京奏論浙江利病四事一餘杭南湖之水發源天目注苕谿下灌杭嘉湖

三府今沙土淤塞侵占者多西湖之水灌田萬頃今湖水淺狹葑菱蔓蔽其他會稽上虞餘姚慈谿諸縣之湖僅存其名難按其實夫水利不修則農田不治請 敕下督撫酌議次第開濬之法一浙省收漕每石私加五六升至一二斗不等宜設法嚴禁一浙省官水陸往來其奉使馳驛者所用夫役有兵部勘合可稽而本省官向無定額多者役及千夫少不下六七百人騷擾實甚宜加限制一溫台諸府斥鹵產鹽多有營兵以搜鹽爲名按戶迫索或將數家食鹽并少報多指爲私販送官邀賞亦宜嚴禁章下所司議令責成督撫凡諸湖蕩俱飭屬詳勘濬治其漕鹽驛路諸弊分別禁治丁父憂

歸十五年赴京補吏部右侍郎仍直 南書房明年五月進

見時

高宗詢知啟豐母年高

賜慈竹春暉扁額八月再出督學

浙江調兵部左侍郎明年乞終養母喪服闋入京仍直 南

書房補吏部左侍郎二十七年秋充浙江鄉試主考官十二

月遷左都御史明年六月遷兵部尙書充 經筵講官奏請

疏通候補參將都司等官又言奉使官向有馬無夫請照赴

任官夫馬並給章下所司議候補參將至五名以上卽予分

發其奉使官需用夫者每馬一匹折夫三名時大學士陳文

恭公請裁官生卷并入民卷啟豐言官卷中額屢加汰損今

蘇州府志 卷八十一
定制不爲過優若裁歸民卷轉無限制亦非所以爲防也事
遂寢八月充順天鄉試主考官三十一年兵部蔣史兩侍郎
有隙蔣訐史於

上前且謂史於衆中詆尙書彭某

高宗召問以弗聞對奉

旨申飭罷史歸而降啟豐右侍郎

三十三年京察以原品休致督撫延主紫陽書院明年秋入
京祝

萬壽又明年冬再入京祝

皇太后萬壽

詔與香山九老會繪圖

賜杖四十一年

春至山東迎

駕復尙書銜四十五年春

高宗南巡迎至龍泉莊其年秋赴京祝

萬壽至濟寧以疾歸四十九年春

高宗復南巡再至龍泉莊歸家卒年八十四啟豐平生坦懷接
物徹去畦町意有不可或時面折人然過已輒忘以故賢士
大夫多樂與之親爲詩文操筆立就旣成必使人盡意抉剔
俾無憾乃已所刻古文旣出邵武朱仕琇歎服曰規矩天成
不煩繩削當今公卿閒未見其比建昌魯仕驥尤盛稱碑版
文以爲虞伯生後一人而已所著詩文集十八卷子紹謙字
濟光乾隆丁卯與弟紹觀同舉於鄉歷任山東陽穀荏平新
城章邱汶上等縣其在新城也地窪下被潦種不能收紹謙

增隄岸添水閘勸民種稻得成熟者百餘頃復於青沙泊築隄以防泛溢民利賴之稱爲彭公隄其在汶上也南旺河隄迤西有宋家窪如釜底瀕窪三千餘頃紹謙導窪水使由嘉祥白蓮花寺下入濟寧趙王牛頭等河折而南至魚臺分洩於南陽昭陽微山諸湖中居民稱利陞曹州府桃源同知請假省親歸先啟豐卒所輯有閑家類纂二卷紹觀紹升自有傳紹咸字與吉增貢生早卒有子六人希濂希洛祝華希涑希鄭希萊紹謙子希韓字玉擎乾隆乙酉舉人所輯有退齋日錄七卷

彭氏家乘

○謝有輝字立夫長洲人雍正甲辰舉人選懷寧教諭每朔望

宣揚

聖諭訓飭士子以教行立節爲先學宮禮器殘缺率先辦治將事之日齋肅恭敬觀禮者稱極盛焉計典卓異授浙江處州縉雲知縣仁心愛民非重犯不加撲扶聽訟時如家人子弟諄切勸諭之兩造各不爭革除陋規徵收自正供解費外無絲毫贏餘自賣田畝爲民代完有解無徵銀兩乾隆丁巳秋縉雲風雨災田禾被傷有輝抱病勘災越嶺渡溪犯寒暑病卒年七十三所纂有古文賞音二十一史譌異

元和
新志

○吳士端字季方吳縣人父廷楨見文苑傳士端少穎異未冠補諸生以省侍入京康熙五十四年廷楨方領書局卒於官

內務總管奉

命來視喪并錄在京邸之子遂以士端名

聞

特命服闋入武英殿行走預修韻府拾遺等書成授

玉田知縣時雍正二年也擢永平知府歷霸昌道溫處道乾隆十三年授陝西按察使遷甘肅布政使調貴州二十二年降補四川按察使逾年復遷本省布政初任玉田頻被水患士端疏濬賑恤有法時怡賢親王承

命履勘民遮道焚

香謂活我者吳侯又有無賴子偽稱爲怡邸所遣騷擾郵傳士端以計拘留密陳於怡邸大爲王所稱賞觀察溫處溫郡歲歉石米四兩士端請暫開海禁舶至價平百姓歌之甘肅軍吏盤踞作奸士端下車立置於法四川囁嚅之患相習恬

然士端捕治不遺餘力設立科條著爲永例生平廉介不名

一錢旣罣誤左遷假歸又以賂項鬻產徙居家居十年卒年

八十三

陸燿撰墓誌

○顧濟美字兆槐元和人曾祖國本居蘇城白塔子巷築淡園日集名流賦詩飲酒於其間沒後私謚貞孝先生有專祠濟美起家官雲南通海知縣興利除弊有鐵面青天之頌題陞嵩明知州入覲以母老乞假省親

世宗溫語褒嘉

賜古硯墨刻蟒服貂皮香珠等物陞紹興

知府增置大成殿兩廡修建稽古閣六賢祠穀山書院疏濬三江水閘丁母艱百姓阻道請留者以萬計大吏以聞奉

蘇州府志 卷八十一
旨在任守制時方亢旱濟美回任甘霖大沛越人以甘雨
隨車扁額懸諸府門雍正十二年陞浙江鹽驛道乾隆八年
陞甘肅按察使折獄明允十四年調福建按察使臺灣一郡
孤懸海外姦宄之徒混迹其間作奸犯科濟美嚴流民之禁
臺地肅然十六年陞布政使二十七年調任廣東護理巡撫
篆卒於官年六十有七子載光孝義有傳

○顧樾字肇聲先世自金陵遷蘇州樾循例謁選得福建浦城
知縣屢斷疑獄釋被誣論死者二人時方重勸墾之令浦城
故無曠地前官強民報墾而稅之民大困樾免其稅建先賢
楊大年眞西山兩先生專祠以母喪歸乾隆七年補陝西蒲

城縣前官留獄至數百事樾取次審決半年而清錢糧收納
舊無冊籍可按乃造實徵冊設銀櫃令民自封銀投其中賊
殺王之博幼女前令坐其叔母與人通因而致死抵死罪者
三人樾察其寃得雪猾賊閭之發行竊數州縣以賄通上下
吏不能捕樾突擒之治以法設書院立義學教諸生徒頒先
輩名文爲之式士咸奮於學遇大計以才薦吏部列一等議
敘因入貲爲中書舍人旣去蒲城人爲立去思碑著有碧雲
堂集金石考二卷

彭啟豐
撰傳

○金祖靜字會川又字定濤號安安吳縣人父縉文苑有傳母
方氏名京能詩嶺南方殿元女也雍正初祖靜遊京師薦舉

賢良方正科引 見授戶部雲南司主事學習行走陞廣西
司員外旋擢雲南司郎中從大學士忠勇公傅恆經略金川
佐理軍務能辛苦處事井然有條理忠勇公深器之旣凱旋
授四川叙州府知府以親老告近省補山東濟南府知府擢
濟東泰武臨道調運河兵備道告養回籍丁內艱服闋入都
授浙江金衢嚴道調湖北荆宜施道擢貴州按察使署布政
使歷官三十餘年俱有惠政年七十五致仕歸所居授經堂
在金閶門內臯橋里之包衙前每坐一室蘆簾棊几瓦枕藤
床晏如也讀書老而彌篤案置五色筆見載籍中有人地事
蹟先後可疑者必釐而點乙之作蠅頭小楷撮記大要以便

緝閱書法自幼模虞永興繼從外舅楊賓遊始攻晉帖四十
後從二王稍降趙集賢而尤近文待詔用筆羣從子弟以時
相見問字必博徵古今緣起根末終日無倦性好儉常語人
曰惟儉可以養廉惟儉可以惜福起居飲食澹泊寡營著有
定濤詩文集十二卷藏於家年八十一卒

○馬燦字次周常熟人寄籍順天舉京兆試授內閣中書軍機
處行走密勿清要謹慎緻密擢御史歷遷至順天府丞畿輔
重地勤於職守吏畏民懷攝府尹事以同官累降補中書遷
侍讀時內閣侍讀學士無漢缺軍機大臣奏請添設漢員可
為燦陞階而燦先以疾卒子重字伯厚年十七以宛平籍中

式任清溪知縣重子鈺字研組陝西籍解元

陶傳

○龔克庸字叔度常熟人父大潛字雪航善填詞著蕉雪樓詩餘十三卷克庸好讀書工駢體文尤善爲詩貧甚挈家之長

安蔣文肅公廷錫厚遇之由教習任竹溪令嘗修廢堰爲民

利邑人名之曰渤海堰卒於官柩不能歸遺文散佚

陶志

○吳其炎字恒叔吳江人樹臣子其炎以雍正己酉拔貢授陝西知縣歷知定邊武功長安諸縣以最績薦補清澗知縣創書院修城垣續舊志百廢具舉每單騎親歷田畝勸諭藹然如慈父母清澗士民擬之召父云其炎天資挺特賦性警敏少從外舅徐鉞長洲何焯遊工吟咏著有興除衍義二十四

條清澗縣續志八卷酌古軒詩集三十卷

本詩集序參家述

子至愉

字寶年由浙江麗水丞陞黃巖知縣歲丙戌海水驟溢居民漂沒至愉不及詳憲亟呼舟攜錢米棺木親馳被災所死者隨殮隨埋生者散錢給米水定後鄰縣民人非殍卽徙境內幾爲一空獨黃巖以次復業不匝月安堵如故上官聞而賢

之

江震續志稿

○席雍字喈仲常熟人前席子以例授刑部員外郎遷郎中出知鄖陽府時方議開墾屬邑承風增數虛報雍行部勘汰其不實者擢陝西督糧道權按察使臨潼大猾康某淫殺數案巧脫問官別捕民陳姓當之雍察其冤督屬詳問論康如律

尋入為刑部郎中告歸卒子紹元字大之以四川鹽課大使署彭山縣民間輓轡引江水灌山田不勝勞紹元鑿通山泉築堰溉田萬頃民德之紹凱字獻之以舉人歷知山西聞喜安徽宿松等縣精於治獄所至民懷弟襄字成叔任兩浙運副襄子紹容字敬堂以例授戶部員外郎慷慨好施周恤親族有祖父風

縣志

○蔣溥字質甫一字恆軒常熟人大學士廷錫子雍正庚戌

殿試二甲第一名進士選庶吉士直南書房特賜廷

錫一等輕車都尉命溥承襲連丁內外艱服未闋授編

修充日講起居注官進侍講擢左春坊庶子陞侍講學士

乾隆己未會試同考官未撤闈遷內閣學士兼禮部侍郎陞吏部右侍郎尋轉左兼刑部侍郎兩部事多所釐正辛酉典浙江鄉試壬戌充經筵講官旋命署湖南巡撫值歲

儉奏出常平穀平糶不為限制民食以給楚南舊不知蠶織溥涖湖之歲長沙諸處野蠶成繭大者如雞卵繅治之每顆得絲數銖以上因下令民間收採遺種教以飼蠶練絲之法明年蠶事大興楚南泉布少流通民多盜鑄又溥小不任使用溥察知辰永山谷閒多產銅奏請設鑪座開局鼓鑄兼買黔粵餘銅廣儲工本錢出益饒俗用小錢悉以官錢易歸鑪治偽鑄之風不敢自止洞庭湖濱曰文洲圍者故官地也豪

民爭擅爲利藪植菱養魚歲收厚息往往結訟溥親往履勘爲築隄加防涸以成田得上腴萬畝分結貧民耕種限以三年起科利興而訟止嶽麓有南軒書院年久傾圮溥規而新之奏請 御書道南正脉扁額懸於講堂延名宿爲山長校諸生之能文者進院讀書越二年入爲吏部侍郎軍機處行走戊辰充會試總裁官進戶部尙書加太子少保癸酉七月淮揚水災有 詔截留江蘇漕米四十萬石復酌留本年秋撥銀兩以備賑濟溥慮秋撥冊檔到部尙遲請將春撥所留協濟鄰省之項先儘本省濟用 俞旨允行十二月奉 旨協辦大學士兼署禮部尙書掌翰林院事己卯正

月晉東閣大學士兼戶部尙書庚辰會試充總裁官時已得疾日益劇以辛巳四月卒於位溥性寬厚而警敏絕倫自通籍後精心奉職凡所陳奏無不深契

上旨前後

賜匾額曰經邦濟美曰韋平世澤

上親臨視病者再及卒

駕親奠醊入門哀慟悲感左右加

贈太子太保

賜祀賢良祠並祀鄉賢諡文恪

聖駕南巡追念溥世臣舊勞歷次遣官至墓所致祭子櫛賜棨元樞櫛字作梅乾隆辛未進士選庶吉士授編修尋擢司業翰林侍講襲輕車都尉卽家授左副都御史晉兵部右侍郎轉左侍郎以疾卒於官 賜祭葬賜棨字戟門官至戶部

侍郎倉場總督元樞字仲升以舉人任福建知縣歷陞臺灣府知府重建木城培單為複濱海處增創堞樓礮臺規畫經久護理學政添立澎湖人應試者為澎字號歲科取進一名增葺文廟學宮禮樂器皿咸備俸滿歸卒

縣志

○周範蓮字效白號萼君長洲人雍正庚戌進士入翰林典乙卯貴州鄉試乾隆元年出知嚴州府土瘠山多緣溪田不可種地征如故建德尤甚範蓮履勘得實力請豁免桐廬灾躬親賑卹賦重者請減舊額三之二淳安前直新安江水悍隄壞範蓮築新隄禦之尋調紹興府嚴州士民立去思碑與思范亭相望焉至紹興修江塘海塘清釐夏蓋湖官田濬餘姚

汝仇湖郡大水上虞水及城垣觀察往勘饑民譁擾範蓮即日發賑治為首者一人眾乃服又築榆柳利濟二塘以工代賑存活甚多署寧紹台道延孫灝方燦如陳兆崙徐廷槐諸名宿先後主講戢山書院文風益振旋以失察呈吏議鐫級調用尋乞養歸丁母憂服闋授南寧府同知總運左右江五府鹽務清釐積壓未運引鹽署鎮安府卒於官年六十五著有學古齋集

嚴州紹興府志參家述

子光鏞字笙閒乾隆己亥舉人官

休寧教諭陞國子學正著有丁未詩存

家述

○陶正靖字穉衷常熟人元淳次子雍正庚戌進士選庶吉士授編修乾隆二年改御史遇事敢言時令翰林科道諸臣輪

進經史解正靖所撰

高宗大稱善越次內陞一歲中由鴻臚卿歷右通政使左僉都

御史尋擢太常卿方謝

恩召對忽忤

旨鐫級歸卒

年六十四正靖天資高朗讀書務實用不喜華縟所作古文
奏疏雅健條達一時罕及性伉直遇人無粉飾是非所在盡
言招過不顧也篤於友誼能赴人之急所著晚聞堂詩春秋

說共若干卷

舊志

○李治運字寧人號漪亭吳江人翰林編修重華子雍正庚戌
進士授刑部主事陞員外時有總戎崔某參劾大臣事尚書
以下皆欲置崔重典治運力援正律事得平反陞禮部郎中

乾隆七年考試學差第一督學山東每試士必手著一篇以
示程式旋授榆林知府累遷安徽按察使鳳穎等處習俗強
悍治運嚴禁打降以馴狠鬪懲賭博以清竊案部內肅然民
懷吏畏丁父憂服闋補浙江按察使三十年

高宗南巡

御書萱榮頤慶四字

賜之巡撫某劾其迂

緩沽名遂以養母乞休治運任浙臬八載嘗謂理刑名者不
可故示優容使人玩法亦不可崇尚擊斷絕人生路惟就其
人應得之罪而推求其獲罪之由則情實與可矜辨焉浙東
等處故多游匪捕役賄縱因奏請官弁約束兵役分派巡哨
以收設兵衛民實效嘉湖所屬水鄉漁戶多為匪必嚴加稽

詰以安行旅浙省洋面與江南福建毗連從前稽查海口祇究其所出不窮所入請於出洋船隻領照時將貨物詳登檔簿查有不符即加根究有失事者將失單傳知各口其出入船隻貨物有與失單相似者立可盤獲庶海洋搶劫之案可清回籍後與二三朋舊論文說詩喜寫墨蘭得趙子昂筆法乾隆三十六年卒年六十二著有漪亭詩集六卷

江震續志稿參袁枚

撰墓表

○錢鋈字貢金常熟人雍正十三年舉人授撫寧知縣撫邑百餘年未有鄉舉者自鋈為令教其邑士不數年舉者不絕以才調江夏羅田奸民馬朝柱與陽邏吳南山謀不軌鋈搜獲

其魁擢知蘄州歲大稔米踴貴鋈請出荊州儲軍米一萬斛平糶民以無飢治行累最擢知黃州府尋以憂歸服闋補甘肅哈密道會改滿缺移陝西旋陞陝西按察使調四川綜西征軍餉不一月就陞布政使凡五年統計金川口內口外支用軍需銀五千二百五十九萬有奇千頭萬緒勾稽考核秩如也倥偬中不忘文教修文廟葺講堂與書院士講學不輟奏請

陞見中途疾卒

恩加侍郎銜鋈居官恪慎宦

跡所到輒繫人思其去黃州也傾邦士人舟送數百里其監司巴里坤將去耆民抱哈密瓜以獻鋈祇留其一士夫嘉歎曰前有一錢太守今又得一瓜觀察送者皆涕泣而別

家述

○趙森原名貴樸字素存常熟人曾祖廷爽諸生嘗上書請減蘇郡浮糧父友倩善醫術森九歲能屬文嘗作虞城賦數千言宿老歎服雍正十三年舉於鄉先是森嘗受知於太傅鄂爾泰及戊辰司衡者為太傅子森引嫌不試甲戌考授內閣中書尋以他累罷森與仲永檀同年仲劾九門提督鄂善上以為直超遷僉都御史森與書以為薦賢受上賞古有之矣劾人受高官未前聞也此位宜辭時人稱之著有蔚子詩文集蔚子小學顧鎮墓誌弟貴棻字可法才亞於兄由舉人與兄同考授內閣中書官至福寧知府陶傳畧森子同翮字振六性至孝學有根柢乾隆乙酉舉人知甘肅徽縣通省捏災冒賑同

翮任五年獨無染大吏重其廉調張掖有惠政潔已如故謝事後以交代不能即歸張掖民醵金代償歸理故業承家學工詩古文辭善楷法人爭師之及門成立者眾分修脯以餉親故居官居家不激不隨人敬而愛焉縣志
○屈成霖字啓商常熟人乾隆元年進士故事進士為縣令吏部以次銓授是歲

高宗親簡數人以知縣即用成霖居首初任盧龍有治聲擢景州知州濬惠民渠築運河月隄修葺州志振興書院政教不著癸亥畿南飢奉 詔發賑異時每戶率賑二口成霖計口施賑無遺引疾歸置義田贍族設安濟堂收養貧病無依

者冬製絮袍給道路寒者夏具蓆帳以施囹圄年飢則貴糴而賤出之官築海城募人擔積收遺骸凡五百七十四積埋廣仁局義冢倡修學宮規制宏整其他捨田捐貲不下數萬著景州志習是編經史參同卒年八十四子曾發字魯傳乾隆戊午舉人選畢節知縣初至黔檄署開州州有東臯書院曾發選士肄業躬自督課購書貯院文風振起畢節為三省驛路舊例差馬每匹給銀一錢民馬匿不出曾發四倍其值民樂受役郵遞無滯鉛廠運員多以稽遲挂吏議大吏檄曾發協運六百萬斤曾發念誤運由於短價佐以私財運遂速歲嘗代理府事大定土酋安照兄死欲奪嫂志而據其產嫂

陸以死自誓衆猶咸憤控之曾發懲照而獎其嫂照復以奸淫為村民所傷所部將構釁曾發馳諭之事遂弭以疾告歸曾發精於六書勾股之學著有九數通考萬言肄雅邵齊燾撰墓志

參家述

○蘇宏遇字掄青吳江人乾隆丙辰進士官泗水知縣為政不務苛細初至增建社學興起教化勸民植農桑勤畜牧泗俗丕變邑多泉源額設夫挑濬冬則調治濟寧運河泉夫苦之宏遇請運河工歸本州就近雇募公私皆便山田為豪民隱占前政莫能詰宏遇丈勘得實置豪於法一縣肅然尤善折獄泉林寺僧沙興殺同寺僧移其尸以遇崇告越數日於麥

田中得木棍半截視之有血宏遇召合寺僧問狀指與曰殺人者汝也搜其室半截木棍及血衣在焉興乃伏罪聶永福者與杜某同居各傭於外聶疑其妻與杜有私夜潛歸殺其妻佯從外入誣杜以奸致死宏遇察聶頸有爪傷痕命驗死者指甲脗合蓋其妻死時曾與格鬪故也人驚以爲神丁母憂歸卒

蔣恭棨撰傳

○沈宗湘字六如號蕤村本姚姓其先杭州人父遷吳江乾隆元年進士任新淦知縣邑每歲額輸漕四萬餘石漕船皆泊會城繇縣倉運至省以達於漕費用不貲宗湘曰寧累吾身毋累吾民在任三載移用公帑千金鬻產以償尋告病歸宗

湘少與李重華相劇切以能詩名在新淦愛其山水之勝吟咏不廢歸里後應聘爲笠澤書院山長與諸耆宿結歲寒會卒年八十一

江震續志彙

○何炳奎字虎占本名錫疇吳縣人雍正乙卯拔貢生乾隆丙辰舉人除江西定南知縣調彭澤所至有聲定邑接壤粵東惠州四十年溪河淤塞成陸炳奎鳩工疏濬爲江廣通津商民永便贛郡歲饑令平糶炳奎盡常平所有糶之及調任查米無缺彭澤濱臨馬當山多江豬暴發爲害炳奎宿廟禱於江神潮汐平江豬他徙村堡中多盜耕牛者令鄉農每牛截一角爲記存官事發其角痕日月皆符則罪之賊無遁情亦

無冤情也告歸卒子南璋乾隆甲午舉人

陳棟撰傳

○王荃字景芳號介磐崑山人乾隆丙辰舉人官內閣中書歷遷內閣侍讀刑部郎中有民婦陳氏其夫自外歸一夕死既殯疑死於毆控驗坐誣論死荃謂例載誤執傷痕不得與讎誣者同罪民人王道友聞母夜呼救急握刀起逐賊既而知爲伊叔圖姦母氏憤極殺叔論斬立決荃謂叔已自絕於倫常不得以殺叔論並駁議上之得免死擢御史值歲歉奏陳積貯利弊請推常平之法於鄉社因社倉之規而行以常平條具甚悉又慮常平糶數多則買補難設買補未足米價正昂懸額不可派採又非是宜預籌通變之法因奏言一宜清

查舊存溢額之可撥補者以杜隱蝕一宜將捐納貢監諸款在本省收納本色存倉一本地捐穀除碾給兵米外餘宜通融撥補并款以絕侵漁如此而額猶未充請將刑部贖罪各條準時價以穀易銀就本省完倉存貯所言皆切中事理既又奏三年計典宜責大吏杜奔競黜浮華以端吏治之本語尤切直聞者忌之在臺二年章屢上後以劾福建巡撫阿思哈忤旨降都察院經歷閱五年請假歸後阿思哈以事敗

上思荃言而荃已卒年五十一荃少孤具至性見父遺書輒悲感流涕事母以孝聞喪偶獨處垂二十年不畜姬侍通籍後

清操彌勵所至以勤職稱遇事敢爲無所瞻避既歸足迹不入城市當道雖故舊未嘗一通名刺性喜讀書尤嗜朱子綱目馬氏通考以爲古來政治得失莫備於二書其他詩古文詞行草書俱有古人法度

崑新志彙參
鄭虎文撰傳

○吳至慎字永修號林塘震澤人曾祖兆宜見文苑傳至慎乾隆元年舉人官霞浦知縣縣僻處萬山中有鄉民藉持齋聚衆至慎往以禍福曉諭之咸悔悟適福安有獄亦如之會以左道定讞上官檄至慎推鞠廉知實貧民志在誑取財物而已悉予末減旋調閩縣在任四年所平反疑獄不勝計等以事忤總督意被劾去官逾年陳宏謀爲閩督奏起爲靈山知

縣未幾卒至慎在閩嘗品其地產壽山石素心蘭荔枝爲三妙繪圖題咏著有林塘詩彙子鍾僑字惠叔弱冠遊京師入太學受業紀昀之門乾隆二十一年舉人歷知四川之西充東鄉峨眉隣水四縣皆環山糾紛地勢阨塞民復健訟鍾僑令訴者至堂下決訊立剖遣之塵牘一清會滇南緬匪滋事官軍進勦奉檄委辦軍需經理各路馬政踰年授營山知縣未幾王師討金川飛芻輓粟轉運索橋峭壁間加意撫卹夫役數千人咸感訟卽其地建邊徼甘棠坊時官軍移駐阿哈木雅鍾僑隨營疾作卒年三十九鍾僑敦行好學能文章兼工書法

江震續
志彙

○錢之青字公理震澤人乾隆丙辰舉人官山西保德州知州明忠臣周遇吉未有祀典首請建祠遇荒設法賑貧催科不加鞭朴愛民勤政莅事之暇吟咏不輟解組歸囊橐蕭然杜門靜養著有五峯行役數峯詩鈔子大培另有傳

江震續志橐

○趙宗堡字威遠震澤人高祖康祖淑俱以孝友聞宗堡至性過人與兄弟淬磨行誼攻苦制舉之學乾隆元年舉於鄉選授廬江縣知縣廉勤自矢悃悃無華不善事上官逾二年去任居家篤於族親葬其伯叔調贍貧乏卒年七十四門人錢大培經紀其喪

江震續志橐

○宋邦綏字逸才號况梅長洲人父照見文苑傳邦綏乾隆丁

巳進士改庶吉士旋丁父憂七年散館授編修九年充河南鄉試正考官遷侍讀提督湖北學政十二年調山西學政尋

詔仍留湖北任十五年奏言開報生員優劣責在教官

有時教諭訓導俱係新任者諸生賢否素未深知值學臣歲試輒以無優劣申報請嗣後許聲明展限如報有優劣學臣查核得實於科試時補行報部下部議行是年丁母憂十八年服闋補侍讀充日講起居注官尋授四川東道道二十一年遷河南按察使二十二年遷廣東布政使二十五年調山西布政使二十七年擢湖北巡撫湖廣總督愛必達湖北臬司沈作明俱以縱歸州盜犯張洪舜事得罪

高宗以邦綏莅任日淺僅予革職留辨隄工尋授陝西布政使三十年授廣西巡撫三十一年奏言鬱林等處山嶺土坡現飭履勘勸耕酌借牛具籽種以盡地利又各屬舊設土勇堡卒徭獐地方設狼兵狼目各給軍田輕其糧賦平居守禦巡防有事征發調遣嗣因兵額缺少田糧轉輾私售經前督臣楊應琚奏明清查臣抵任後飭催查出軍田十二萬餘畝給土勇狼兵戍守有資可無混淆

上嘉勉之有鎮安府屬之小鎮安土司者界連安南匪犯黃副團等糾衆出外滋事邦綏飭屬捕獲置之法奏革土巡檢岑純武職並言土巡檢職卑難以控制請改設通判一員整飭

化導又歸順州屬之湖潤寨人戶稀少應裁原設州同將宣化縣那南寨巡檢移駐那南寨事務歸併金城寨巡檢管理再於那波者賴者欣三村增卡一所兵十名土勇二十名怕懷隘爲小鎮安門戶增設把總一員兵十五名土勇三十名令兼轄那波等村下部議行三十二年奏言粵西太平鎮安二府並南寧府屬之遷隆上岡皆與安南接壤其間有三關百隘向例每冬知府副將親查一次請嗣後每年春夏秋三季令太平鎮安南寧三府同知通判同汛弁巡查於交界處所會哨事竣報明查考其冬季仍舊令知府副將親查各關隘原設汛弁防守飭製造籤旗填注汛名各於所轄輪班巡

查籤往旂來疎懈者參處奏入報 聞二十二年授兵部侍郎三十四年署倉場侍郎調戶部侍郎三十五年卒子思仁另有傳

○錢以銓字揆敘常熟人父鵬翔字南池歲貢生有學行著有毛詩通解廿一史要義及經疑史略諸書以銓乾隆丁巳進士授霍邱知縣霍邱地僻多盜俗又好訟以銓至悉擒治如法邑西北濱淮河頻被水災以銓親歷賑卹復修築大壩水患以平越五年引疾歸卒年七十三著有崇雅堂詩集陶志稟

○唐瑩字叔先崑山人乾隆戊午副貢充景山教習改補覺羅官學授四川樂至知縣善聽斷民劉姓者控其女爲翁吳某

斥賣吳恐訟累倩邑紳居閒瑩怒將置吳於法迨就訊知吳富而劉貧嚴鞫劉得匿女圖賴實情卽令吳某當堂具狀領歸客民鍾姓控妻父楊某悔婚更字楊恃媒妁已亡力辨許字之女早夭鄰里同詞瑩見其次女與鍾年正相當而更字之夫年將及艾隔別嚴訊則年月聘物互異乃斷令卽日與鍾完婚會 王師討緬匪飭辦馬騾牛隻瑩慮常格給價易派累捐俸加價購求不數日而事集攝篆資陽值大旱瑩走烈日中登山祈禱雨遂降遷江西九江同知左遷湖北歸州知州時 大兵進勦金川州當衝要瑩承辦驛館晝夜不遑旋忤太守意罷官竟以積勞卒子洪緒字襄周乾隆庚辰

恩科舉人官山東滕縣知縣有能聲惇緒字敘典官奉天

司獄

崑新志稟

○周元理字秉中號燮堂吳江人年十九以仁和籍入學乾隆三年舉於鄉十一年簡發直隸以知縣用得蠡縣旋調清苑以總督方觀承薦擢知廣東萬州復以經理城工仍留清苑時有部胥持偽劄馳傳者元理察其奸詰問具服奏上

高宗鑒其才調易州知州二十三年擢知宣化府旋丁母憂歸治喪畢時

上方西巡五臺南巡江浙畿輔當其衝自宮館驛傳車馬芻牧諸役悉倚府縣官以辨主者或非其人往往藉端侵漁爲民

厲大吏起元理統理諸務事集而民不擾服闋補廣平府又調天津府時方命大臣會勘津門五閘及永定子牙兩淀之宜疏築者使者多咨元理以決是年調保定府歷陞清河道直隸按察布政二使二十六年授山東巡撫仍往來直隸會勘水利未半年擢直隸總督二十九年山東白蓮賊王倫等作亂破壽張堂邑陽穀犯東昌及臨清嘯聚頗衆奪糧艘爲浮橋渡臨清運河掠西岸

上以畿南地界臨清 敕督兵扼守要害元理馳至故城令眞定總兵萬朝興中軍副將瑪爾清阿集兵千二百人駐臨清西岸遏賊衝會大學士舒赫德率禁旅自德州至夏津而山

東河南兵由東昌館陶扼西南要路期九月乙亥三路會勦
 先二日癸酉賊三千餘人渡西岸瑪爾清阿擊敗之明日我
 師奪浮橋賊退保臨清故城會兩路兵亦至元理令萬朝興
 分兵渡河合搗賊巢庚辰王倫自焚死賊黨悉伏誅他被獲
 者分別輕重以次奏讞事畢乃還明年七十生辰 御書
 扁額及冠服朝珠上方珍物以 賜並令紫禁城騎馬四

十二年奉 命督造

孝聖憲皇后山陵於易州五閱月而竣元理為治持大體不務
 操切遇寮屬泛愛而兼容其廉能之吏亦未嘗不加褒異四
 十四年春以讞井陘獄失平奉 旨解任監修正定隆興

寺寺成擢左副都御史仍署直隸總督明年遷兵部左侍郎
 九月晉工部尚書尋引疾乞休加太子少傅卒年七十有七

疏聞 詔稱老成勤慎令江蘇布政使致祭一壇彭啟豐撰傳

元理少攻舉業根柢深厚嘗偕弟元瑛讀書靈鷲寧峯菴時
 稱二周有青照樓天崇文選行世元瑛字玉存以貢入太學

性恬退不慕利祿兄雖躋膺仕而清介自矢一刺不妄通人

晚以詩酒自娛有青照樓詩集藏於家江震續志彙

○顧元揆字端卿元和人前明給事中九思八世孫父祖望知

富平縣母韓氏名韞玉文懿公葵季女工詩元揆舉乾隆九
 年順天鄉試除龍泉知縣調餘姚民有以謀逆告者按驗無

迹盡釋之而置誣告者如法擢南塘通判攝平陽縣再攝淳安會水災不待請輒放賑臺司駁減銀二千兩有奇至鬻居宅以償回南塘任築室曰吏圃日於其中著書作畫泊如也故事歲一巡視漁籩有供給錢六百緡元揆弗往陞羅平州知州未赴丁繼母憂起補黔西州知州調古州尋卒元揆居官不私一錢時時分清俸之餘以贍族人雖盜無儲粟弗顧也制藝根柢六經能詩書學顏平原畫亦入妙

○蔣元益字希元一字漢卿號時菴長洲人廉州知府杲之子雍正己酉舉人乾隆丁巳考授內閣中書入軍機處行走中乙丑會元選庶吉士授編修庚午充湖南鄉試正考官改御

史提督山西山東學政歷官至兵部右侍郎甲午充浙江鄉試正考官提督江西學政戊戌京察以原官休致辛丑主婁東書院甲辰

高宗南巡迎於龍泉莊

賜豐貂文綺移主紫陽書院乙巳

赴京與千叟宴

賜壽杖貂皮緞正朝珠等物三十種戊

申卒於家年八十一嘉慶九年奉

旨崇祀鄉賢祠元益

少有夙慧於書無所不窺乙丑會試卷進呈時列第七

純皇帝賞其三藝清真

御筆親改第一官御史時不輕建

言癸酉秋上請更河臣一疏未幾南湖決遂受

上知性喜習騎射督學時校試武生最稱得人已丑奉

命

教習庶吉士向來庶常每月分課惟二八兩月舉行大課元
益改爲閒月大課一次是科留館者最多遂爲玉堂故事生
平著述甚富有廿一史訂誤周易精義清雅堂詩餘藏於家

鄉賢錄

○方懋祿字澄園元和人乾隆戊辰進士以知縣用歷新城南
城清江棲霞海陽商河其任清江當袁贛二水下流泛溢爲
患舊有隄亘五十餘里土甃石礎弗能堅也懋祿至構巨木
爲杙與板先於水底置杙杙以內板護之介以鐵屹爲巨防
乃覆以土堅築之隄成堅固其在商河所轄王化一庄爲盜
藪官司捕治則竄鄰境懋祿偵知姓名籍記之至歲除夜率

壯捕二十餘人冒雪突馳至庄案戶收捕無得脫者境內帖
然辛巳秋潦傷稼懋祿周厯葺屋策馬行泥濘中或竟日不
食爲令十年授粵西德勝同知調桂林又調百色己丑擢襄
陽府知府郡當秦豫之衝民剽悍喜佩刀小不合舉刃相向
懋祿下令輸之官倍價以給傷人之案稍減隔江樊城夙稱
巨鎮稂莠蘖芽其間懋祿捕其魁置之法又於沿江添置舩
艚分遣邏卒巡警羣盜聞風遠遁三署安襄兵備道以年例
告歸愛松陵地幽勝徙居之性孝友篤行誼兩分鄉校得人
稱盛家居目闔不能繙書作字猶朗吟口授其子令書以爲

常卒年七十三

金學詩
撰墓誌

○葉鑒字道徽崑山人重華元孫乾隆戊辰進士授四川萬縣知縣地當水陸衝奸宄竊發獄訟繁多鑒獨勤於聽斷治事限以時日理官書不假手幕佐庭無留牘嘗雪部民林一俊之寃抵豪惡傅崇道之罪民大悅服以事鐫秩尋復官補羅江禁暴止貪如治萬時罷歸卒

崑新志彙

○邵齊然字闇谷常熟人齊燾弟年十八舉於鄉明年中乾隆乙丑會試以疾遽歸戊辰補殿試選庶吉士散館授刑部主事進員外郎調兵部己卯分校順天鄉試遷戶部郎中出知温州府署寧紹台道調杭州府所至專務惠愛化民而民亦愛之以母老乞終養未及歸卒杭州府志傳列名宦齊然

幼聰敏與兄齊熊每夜課閱資治通鑑一卷書法類歐褚兄弟並有名於時別見文苑傳

梁國治撰墓志

○顧德懋字慎衡元和人乾隆辛未進士授南昌知縣猾吏舞文寘於法吏不敢犯陞刑部主事遷員外擢禮部郎中清正自持同僚敬憚以疾乞歸尋卒

家述

○沈棻字欽伯號宗婁常熟人父淑見文苑傳乾隆丁卯舉於鄉值生祖母喪不預計偕勸駕者謂服生祖母承重律無明文棻泣然曰禮順人情而已父既弗獲終養棻代父守制可也辛未登進士二甲第一選庶吉士授編修署日講起居注官擢右春坊庶子兼翰林院侍講先後典雲南湖北省試

充鄉會試分校者再出爲河東兵備道夏縣白沙河發源中條山出巫咸谷西流而南入姚暹渠水盛時漫延村落并浸及鹽地棊議建石堰水患以弭蒲州南郊柳溝山地爲民間業營并請作牧場棊親勘得實不聽擢河東鹽運使河東自鹽池被災後鹽產不旺商力頗疲棊請開六小池并買運蘆鹽以資接濟又以隰州大寧永和二處土鹽不過池鹽半價奏請改食土鹽民無仰配之擾商亦不累卒於官棊以詞臣而於吏事精敏工詩文雋逸清新書法酷似張文敏彭啓豐狀

○錢汝楠字晉裴震澤人少孤好學枕藉經史爲制舉文研精覃思力闢奧義入太學乾隆庚午中順天鄉試選平順知縣

抵任時值大旱邑中荒歉米價騰貴汝楠亟發常平倉米設局平糶又請出社義倉積穀借給飢民全活無算晉省素稱饒裕汝楠作令不名一錢折獄務極審慎卒於官貧無以斂同僚醵金助之遺櫬得歸著有南喬詩草

江震續志稟

○葛修齡字兆九崑山人錫璠五世孫父李琦郡諸生嘗割股療親疾修齡以供事授直隸高陽典史地係瘠土舊有社差累民修齡以其弊白當事裁之用順莊滾催法官民稱便邑故有官隄禦水患邑人惑形家言欲廢之修齡條陳利害諷邑令申憲以遏浮論後大水得免淹沒以疾卒官子峻道字際天亦以供事選湖北安陸照磨改登州黃縣黃山館巡檢

蘇州府志 卷八十一
值逆匪王倫之亂奉檄搜捕餘黨巡輯數州縣未嘗株累一

人崑新志

○席夔字浣香吳縣東洞庭山人歷知山東夏津汶上諸縣乾隆戊戌卒其在夏津時河暴漲決隄夔冒風雨親畚揭逾月工竣度不足禦險復請增培又一年臨清水灌其境築護隄六里許其在汶上時汶水決口及城以夏津法定之五橋窪地汙萊千里繪水利圖請疏濬瘠土化爲膏腴建樂利牘以蓄洩汶水民德之教其俗種稻紡績夏汶兩邑尸祝不衰工詩善草隸所著澹香吟集子維世字筠亭爲浙江永嘉知縣擢杭州西海防同知居官視民如子以興革利弊爲先務去

永嘉之日民攀轅涕泣追送數千里兩權台州倅有東湖隄久圯而苦水溢修築之隄成而堅永嘉西溪茅竹嶺窪地積水成浸禾稼不登穿渠宣洩築長隄以禦水遂成沃壤縣多盜獲其魁蔡撤置於法閭閻以安陞杭郡西防同知適築海塘竭力從事以勞卒於官

○蔣果字華林常熟人廷錫之孫洲之子少爲世父溥嘉許官河南知縣陞知許州路經祥符適當紅紗閘河流泛溢立措錢三千緡以應工需乾隆辛丑青龍岡決口果於下流設救生船並置糗糒活者無算擢開歸陳許道坐累去官歿於京

邱嵇璜撰墓誌

○王鶚字瞻飛崑山人緝植孫入監謁選授泉州安海通判調臺灣之澎湖歲稔買米平糶捐俸爲倡丁艱服闋補福寧擢臺灣淡水同知淡水離郡二百里民番雜處隔一山卽生番時出剽掠鶚輕騎入番砦呼其酋長出宣示 朝廷威德委曲開導酋長稽首聽命俸滿將遷於各隘口添設烏槍爲防禦計以疏報逾期落職尋復補濟南府同知累署泰安萊州武定沂州濟南府事萊故有儲倉餘穀三千餘石例入官橐鶚請悉以辦公有奸民以左道惑衆逃竄鶚奉檄密偵踪跡至臨城得其黨魁置於法餘無株累陞知兗州府值淫雨山水衝發寧陽縣界有石梁口爲泰安東阿東平汶上衆流滙聚之處入汶河濟運梁口築堦防水鶚詢知水溢堦壞令適他出率屬躬督修治不半月而梁口合大學士劉統勳巡視河工鶚備陳兗郡水利蓄洩之要頗采納之調知萊州以疾告歸卒年六十九子若沂字登如乾隆丙午舉人試授河南知縣歷任息縣陳留商水魯山終孟津皆以政聲著在魯山時值教匪煽亂邑非衝要未設備旣而賊烽驟逼百姓惶恐若沂修城堡儲糗糧團鄉勇百姓避難入城者悉納之晝夜巡警賊至見有備引去境內得安卒於官年四十九

崑新志橐

○李章瑄字敏成號酉谷吳縣人乾隆壬申進士官河南伊陽知縣伊陽士風荒陋自 本朝開國以來未有舉於鄉者章

培莅任創建書院遴諸生之秀長者進而教之從此有登科者邑人愛戴之居官廉潔俸滿遷兵部主事年老告歸仍課生徒籍束修之養以自給焉

○郭廷贊字端叔一字蘋洲吳縣人檢討孫順之孫乾隆壬申舉於鄉官山西天鎮五臺知縣陞貴州丹江理苗通判廣東瓊州知府丁父憂服闋補浙江金華知府陞本省糧儲道癸丑歲病假回籍嘉慶四年卒於家廷贊所至有循聲屢釋疑獄歸田後宦橐蕭然杜門養靜放懷詩酒以終第鏞乾隆辛巳進士官河南永興知縣廷采乾隆丙子科舉人官福建詔安知縣

家述

○宋宗元字光少元和人乾隆戊午順天舉人任直隸成安良鄉縣知縣歷陞天津清河道內遷光祿寺少卿父匡業幼以孝稱讀書淡榮利宗元性亦孝乞養歸于舊居葑溪之南卜築網師園以奉板輿又仿范莊例立義莊贍貧族諸從子皆受析產以示敦睦弟文元兆元調元文元性恬淡不違俗能以廉隅自礪以諸生終兆元歷湖北平江巴東湖南長沙縣知縣所至有德政調元歷官江西德安武寧鄱陽縣知縣分寧州知州廣西東蘭州知州終於刑部郎中在德安倡修文廟義學志書在鄱陽修縣志育嬰堂復開靈芝門以便行李清查屯田在分寧爲黃文節公請立祠崇祀及任東蘭亦如

之家
述

蘇州府志卷第八十六終

蘇州府志卷第八十七

人物目錄

宦績十二

本朝

李炯

錢策

金士松

張敦均

章棠

張應曾

宋英玉

彭紹觀

王曾翼

徐作梅

盛林基

沈翰

子芝原

弟敦培

子燮

子希范

子祖武

姜晟

陳桂森 父昌期

陳初哲

祖震 父樹勳

李燦

吳俊

弟樹萱

李世望 子以健

沈之燮

父華

宋思仁

王若常

孫鎬

景如柏

子葵

邱賜書

王宗導

葉元符

費振勳

兄宏勳

馮培

王錕

父堡

歸朝煦

弟景照

恩燕

彭希濂

弟希涑

彭希洛

子蘊輝

潘奕藻

周兆基

王葆元

父愨

金宜遠

宋簡

陳預

父庭學

吳英玉

沈西

王慶瀾

程際韶

蘇州府志卷第八十七

人物

宦績十二

本朝

○李炯字澹成元和人父逢春早卒母督課之夜讀紡織聲相和達旦乾隆元年以五經舉於鄉十七年成進士後授廣東茂名知縣以慈惠為政自奉甚薄嘗題其堂柱曰窮秀才做官何必十分受用活菩薩出世不過一點良心士民誦之每聽訟平心察理縣有重獄或牽連一二十人必案實縱舍所羈候才一二人而已所莅黃塘在山谷間暴雨水溢居民多死者水退請上官發官銀收殮有續報者太守難其請即捐

俸益之其生者爲起竹屋復爲粥食之初有紹興沈生在幕府頗通賄賂炯謝遣之及是客府衙構於太守遂以不勝任勒罷改教官去之日士民執香送者接踵於道作德政歌用金書采旂爲道有警百餘人製布袍獻炯服而見之警曰貧不得錦恐不當公意炯曰服之矣警前捫炯衣果布也則大喜舟過梅棗鎮商民張采棚設樂餞飲三爵後獻百金爲炯壽卻之已而昇炯徧歷鎮中曰公去矣俾鎮人一識公旣歸遂不出卜居靈巖山下野服翛然未嘗謁官府時與及門諸子遨遊山水間晚遷居城中以卒年七十一

彭啟豐撰傳

○宋英玉字應璜壽圖子長洲諸生初官直隸新樂知縣民有

慈父之頌調吳橋緝獲巨盜馬癩子等寘之法疆內肅然鄰邑蝗蝻飛入境英玉率民役窮三晝夜撲淨農田得無害兼署東光縣地當運河要道因伏汛久雨山水暴發決口一百餘丈英玉親歷河干堵禦宣洩三旬而隄固遷河間同知兼署蔚州地多虎患下車日禱於城隍神懸賞選捕一月中連斃四虎地方以安歷廣平順天同知順天屬邑文安本水鄉積淹民田周圍百八十里遂成大窪英玉設法疏掣涸出良田千頃以利民乾隆庚寅陞正定知府調保定府乙未陞通永道旋以屬邑旂租不及格挂吏議罷歸卒於家年六十四

家
逝
子鎔乾隆壬辰進士官至刑部侍郎

○錢策字萬言號葵園長洲人中諧曾孫乾隆甲戌進士授兵部主事遷員外郎出爲九江知府郡濱湖帶江洲渚盜賊出沒無常策設法搜捕得其魁奸宄斂迹屬縣被水災策請帑賑卹民得以蘇調南昌知府斷獄多所平反潔已率屬苞苴不及其門修築沿江圩岸石礮以護民田葺一軒於郡齋西偏名曰鶴石取白樂天詩三年典郡歸所得非金帛天竺石兩片華亭鶴一隻意遂自號鶴石居士旋擢分巡吉南贛寧水利兵備道地界閩粵山谷深險易於藏匪策嚴立保甲稽察周密數郡晏然修贛州濂涇書院延師課士多獲雋去兼管關稅安靜無擾商民稱便署江西按察使適值秋審斟酌

平允是年九卿會勘江西獨無一改駁者旣以在九江時保舉屬員不當部議降調有旨送部引見便道旋里

遂引疾不出策性孝謹事母待弟與從子人無間言生平寡

交遊罷官歸杜門不與外事焚香讀書而已卒年六十錢大昕撰傳

○彭紹觀字禹若號鏡瀾長洲人啟豐次子乾隆丁丑進士選庶吉士丁母憂二十八年授編修明年充國史館纂修官時劉文正公爲總裁深器之三十二年考試翰詹高等擢贊善充日講起居注官歷遷至侍讀學士中間分校會試典山西鄉試俱稱得人四十九年丁父憂服闋補原官仍入史

館紹觀在史館二十餘年諳悉掌故隨時問答無少舛竟歲
纂集無間寒暑論者比諸唐吳兢元歐陽原功云五十六年
以疾卒於官年六十四邵晉涵撰墓誌子希范字嘉材乾隆甲午舉
人官合浦知縣

○金士松字亭立號聽濤吳江人父潤邑諸生士松寄籍順天
宛平登乾隆庚辰進士入翰林授編修擢侍讀入內廷繕
寫金經陞侍講學士乙未入直南書房充日講起居注
官歷遷詹事提督順天學政士松以舊曾寄籍辭詔勿

迴避擢內閣學士兼禮部侍郎乙未春士松年未六十
特命預干叟宴歷兵吏二部侍郎復任順天學政士松七掌

文衡四在畿輔之地充

經筵講官擢左都御史嘉慶元年

丙辰

仁宗睿皇帝御極遇

覃恩賜長孫一品廕生再預干叟宴

充會試總裁官遷禮部尚書丁未轉兵部尚書乙未

賜

紫禁城騎馬十二月扈從謁

裕陵中路得寒疾

特遣醫官診視回京卒年七十一

上遣禮部尚書紀昀諭祭一壇諡文簡士松小心慎密每召

對知無不言而未嘗輕洩於人其於天下兵馬錢糧關河險

要駐防處開載簡明小冊收之夾袋晨夕佩帶以備顧問

所著有喬羽書巢詩集子芝原乾隆乙亥舉人官至內閣侍

讀家述參紀
的撰墓誌

○王曾翼字敬之號芍坡吳江人少穎敏八歲能作韻語讀書過目成誦年十四補諸生乾隆庚辰成進士授戶部主事歷京畿道御史出爲甘肅甘涼道逆回蘇四十三倡亂攻襲蘭州涼之平番縣距蘭僅百里曾翼亟馳往募民夫防禦晝夜巡徼復請於總督檄滿兵協守以通河西運道旋調入省督軍需局兼理藩臬篆尋因公被議褫職未幾起復補平涼府鹽茶同知未赴而鹽茶回民田五等糾衆滋事曾翼隨總督李侍堯率師勦捕時伏羌被圍急知縣楊芳燦晝夜力守食且盡羽書一日七至曾翼白侍堯不及徵調帥帳下卒疾馳

往賊敗圍得解駐鹿鹿山賊掩至官軍列四重前三重戰且卻曾翼親冒矢石神色自若事平以軍功議敘擢鞏昌府知府遷西寧道旋調蘭州道曾翼賦性謙和謹慎其言呐然如不出口其容退然如不勝衣一遇軍國大計元元本本剖決如流五官並用未嘗有誤一時有智囊之目平生然諾不欺居家篤於孝友居官所在得廉名在甘省十八年兩值軍興恒身兼數職以才幹爲總督李公侍堯文襄王福康安委重嘗于役哈密葉爾羌日行戈壁間奔走二萬里鬚髮頓白雖馳驅鞅掌不廢咏歌年六十二卒於官所著有居易堂詩集若干卷子祖武字繩其號蘭江乾隆辛未進士官江西道御

史

江震績
志彙

○張敦均字仲絜常熟人父仁美字遷里附貢生博學工文尤嗜書購藏萬卷手自讐校至老不倦敦均登乾隆庚辰進士授刑部福建司主事歷遷郎中詳慎刑紀勤於其官擢山西道御史條陳竊盜凡有再赦以前之案仍并計定罪部覆報可止辟安良深符律意以父病告歸未抵里聞訃比服闋病不起年四十有二弟敦培字叔因少力學籠鷄榻畔聞鳴自警登乾隆乙未進士由四庫館分校補中書歷官至御史乞養歸卒於家年六十一入鄉賢祠

縣志參
家述

○徐作梅字用和震澤人乾隆二十一年順天舉人考取方畧

館校錄授陝西洋縣知縣丁憂服闋補蓋屋縣調華陰尋告病歸遂不起作梅在關中時適金川用兵巡撫畢沅奏委領軍需局洎補蓋屋卽護送入蜀兵時各屬運送軍裝器械糧草雇驢頭給腳價未有定準作梅則清覈浮冒實用實銷受役者未嘗受累大吏下其法於各省畫一照辦節費數萬計蓋屋營伍最大統藍田鄠縣等處綠營兵敗逃回者法當斬上命分別迎面背傷以憑核辦作梅驗多迎面傷請寬之蓋屋北濱渭滿營馬廠連居民耕地遊牧踐蹋農人苦之作梅請會勘清丈築墩濬構定界址耕者安業先是權知西鄉回民聚衆將構釁作梅單騎入曉以大義縛其魁免餘衆事遂解

性孝友工書法校正唐石經爲之考藝林珍之

江震續志

○章棠字蔭南又字自勤長洲人乾隆己卯舉順天鄉試會試闈卷溢額拔授內閣中書入軍機處行走授起居注主事調兵部職方司充方略館纂修兼提調三十九年陞武選司員外郎是年九月山東壽張民王倫爲逆

上命大學士舒赫德提兵赴勦奏棠隨行棠治辦軍書百函並發事平巡撫楊公保奏留東卽奉

上諭補授濟東泰武道署按察使四十一年調補鹽運使司恤商省費才譽翕如署布政使事勤於職業纖悉必親體素庭羸以勞苦卒於官年四十四

陸耀撰行狀

○盛林基字嘉蔭一字蘋洲乾隆己卯舉人歷官江西樂安知縣雲南新興知州威遠同知署臨安澂江知府告終養遂不出林基重士愛民安苗平獄疏鹽撫竈等善政皆合於古循吏之所爲其署南昌同知也有臨江客自湖廣回被船戶沉於江林基擒治伏法遠近稱神其任威遠同知也向例鹽井滯塞竈戶預支薪本修治按月扣歸公欵林基捐廉二千餘兩修砌完固免其坐扣乞養歸卒年六十三

家述

○張應曾字若谷常熟人增貢生官蒲江知縣蒲多山少水應曾開濬龍爪等堰十六道塘二口灌田一十八萬二千餘畝又闢地八千二頃歲獲豐稔民食以充設立義學捐田以資

膏火虚心聽訟吏無所容其奸嘗有虎患爲文禱城隍神虎一夕渡河去俸滿去任蒲民送至百里外疾終於家著荻洲詩稿若干卷子燮字子和乾隆癸丑進士選庶吉士歷官寧紹台道卒於官年五十六燮少思以辭章名世下筆纒纒數千言嘗注晉書未就年逾四十始釋褐勤於吏事頗有古循吏之志惜設施未究而卒著有味經書屋集小嫻嫻隨筆若

千卷

縣志參墓誌

○沈翰字周屏號立齋震澤人明副使啓之後乾隆癸未進士選保定知縣邑每歲麥熟輒有河間回民驅羊過境踐食一空翰諭父老曰回民來馳白我未幾至翰率所部夜赴之令

民盡驅其羊納古廟中手縛其黨三人置諸法牧羊者自此不敢入境邑頻遭水潦翰悉心履勘躬親賑給修其隄防又盡出常平倉餘米煮粥以食飢民糴而補之漕艘過天津例需楊村剝船邑之張青口多鹽船他縣或取以充役船戶多棄船遁翰爲之計其時日厚其資糧船人皆樂用命其斷訟輒手書所控人名喚至卽訊朝集暮釋尤惡賭博酗酒二事民感其化至私相戒約置金瘡良藥以救人在任十一年獄無死犯霸州雄縣居民與保定接壤者多去其居而來居儼然成聚名其地爲豐樂村時進邑中諸生與之講論遂有登科甲者凡修學宮增建倉屋皆捐俸爲之絲毫不以累民告

魚州府志 卷之十一
病歸主講笠澤書院規約森然年七十三卒於家所著有保

定縣志詩雜文一卷

江震續志稿

○姜晟字光宇號杜薌元和人先世本山東萊陽高祖採曾祖實節見流寓傳晟登乾隆丙戌進士分刑部劉文正公知其能屢稱於

上前授提牢廳補主事歷陞郎中總辦秋審事庚寅鄉試充順天同考官辛卯丁父憂服除仍補刑部郎中任滿奉 旨

以繁缺知府用尙書英廉等奏留以京堂用歷陞太僕少卿仍兼部務己亥授江西按察使明年陞刑部右侍郎丁未充會試總裁官授湖北巡撫先是甲辰歲奉 命往湖北審

辦襄陽縣民徐萬全被蘇許等糾衆毆死一案晟究出徐萬全寔係在逃之王子潮傷斃平反定案及任巡撫王子潮尙未獲乃飭屬緝獲正法凶犯漏網五載至是始戮其勤於所事如此戊申荊州大水晟以疏於防範奉 旨回京仍授刑部侍郎庚戌充會試知貢舉辛亥授湖南巡撫壬子

上命往雲南讞獄以巡撫赴他省審案前此所未有也洞庭湖盜賊爲商旅害晟專派地方官實力緝拿獲積年大盜董舒友等審明正法傳首湖干從此行人無患甲寅祁陽零陵兩縣大雨江水灌城官民房屋多被淹浸晟親往查勘撫卹撥庫銀六千兩按戶散給民安栖止乙卯黔省苗變湖南永綏

廳苗人石三保等應之晟卽馳赴辰州會同總督畢沅進勦
旣而

上命雲貴總督福康安統領大兵合勦晟駐辰州供支糧餉火
藥鉛彈軍裝器械一切皆先事周備又分撥官兵守禦城池
防堵隘口奉 旨姜晟籌辦軍務事宜秩然有序鎮靜得
宜着交部議敘並奉 旨賞戴花翎嘉慶元年加總督銜

時福康安與四川總督和琳統領大兵而先後病故晟與明
亮額勒登保德楞泰鄂輝等和衷集事功成奏凱甚蒙嘉獎
二年七月兼署兩湖總督十月又兼署提督三年苗疆事竣
回長沙省城自著苗疆紀略十二卷四年加太子少保五年

陞湖廣總督六年調直隸總督是年五月京城內外大雨永
定河決晟以疎防革職拿問部議發往軍臺効力贖罪奉

旨發往永定河工次効力贖罪工竣給主事銜刑部行走
七年授刑部侍郎九年授刑部尙書 賜紫禁城騎馬十

一年六月因疾乞假調工部尙書是年九月因前在直隸總
督任內失察藩庫虛收銀兩事降四品京堂十二年乞休回
籍十五年四月卒於家年八十一晟在刑部時受

純皇帝之知派審直省大小之獄二十餘案虚心推究務得其
平操守廉潔取與不苟在湖南清釐州縣倉庫務求實貯後
值軍興糧餉藉以無悞尤愛惜人才爲巡撫時未嘗輕劾一

官嘗曰人各有能有不能棄短錄長無人不可用若因一事之失而斥之後來者未必卽賢於前人也又嘗誦

純皇帝御製詩不爲己甚去己甚之句曰大哉

聖人之言可爲萬世經法此可知其立心行事矣有奏議若干

卷

自著年譜
參家述

○陳桂森字和叔常熟人父昌期廩生其族人祖范序其文稱爲文行完粹桂森幼喪父家徹貧刻苦自勵受業祖范得其端緒乾隆丙戌登進士選庶吉士授編修改御史轉吏科給事中擢光祿少卿歷太常少卿遷大理少卿一爲正考官三爲同考官兩爲學政巡城巡倉者一巡漕者再桂森起自單

寒崖岸自峻未嘗干謁當途其在翰林遇大比之年四方士子雲集憚其清正不敢有所請託視學陝甘不收供應一切所需悉發價值任御史時有議更天下寺僧度牒者奏停領牒公費巡視倉漕嚴飭僕從不得交通屏除陋規謝絕饋遺督學廣東未及按試疾卒疾亟時撫軍郭世勳來視入臥室練帳蕭然太息良久而去詩文和粹如其人書學得力於李北海趙吳興

邵齊熊
撰墓誌

○陳初哲字在初號永齋元和人祖震字彥瑜品學醇厚爲何義門入室弟子父樹勳字光岳沉毅濶達不爲章句之學四十不第游秦閩間公卿爭折節與之交尹文端公總督兩江

尤器重之遇事悉就裁決初哲幼而岐嶷弱冠善屬文工書
日寫千字文一本乾隆己丑進士 廷試對策閣臣擬第二
上以條論切直擢第一授翰林修撰充 武英殿協修習 國
書通音義辛卯散館第一

上曰漢人中不易得此乙未充會試同考官丁酉春恭書

孝聖憲皇后附

廟神位徽號秋充陝西主考官戊戌分校禮闈京察一等授湖
北荆宜施道江水暴漲沙隄壞飭吏民亟發土囊塞之親往
督禦七晝夜水漸消落民居以安遂出俸錢加築隄益鞏固
會荆關裁監督官初哲以道兼轄權務用人明恕胥隸罔敢

作奸 國課無缺商民不擾丁母憂歸尋丁父憂哀毀倍至
慎終如禮以城東老屋讓其幼弟同哲而卜居於薛家弄築
樓三楹略築山池顏曰小蓬瀛奉安先靈爲家祠亦朝夕懃
息以自適焉丁未六月一夕暴卒年五十一弟希哲字復初
乾隆乙酉迎 鑾獻賦 召試 欽賜舉人授內閣中書

蔣元益
撰傳

○李棻字文翰號滄雲長洲人爲諸生有聲庠序間十試而舉
於鄉乾隆壬辰成進士由內閣中書歷陞至光祿寺卿奉天
府丞嘗典湖南四川鄉試視河南四川學政悉心校閱士論
翕然晚年告歸以著述自娛卒於家

○吳俊字奕千一字蠡濤晚年自號曇繡居士吳縣人乾隆壬辰進士授內閣中書在軍機處行走博聞強識下筆如飛背微隆起額駙公福隆安嘗戲指其背笑曰此中一包書也充湖北雲南主考視雲南學政丁母憂歸喪葬既畢適文襄王福康安建節八閩道吳門延俊掌奏記未幾安南內訌其長黎維祁幼而懦國人不附其臣阮光平有異志文襄奉命調兩廣總督處置其事俊隨文襄權進止之策議者或以爲宜乘亂取其地或以爲宜復黎而誅阮俊曰交趾之地雖漢唐嘗隸版圖然不過羈縻不絕仍聽其酋長自爲約束得之不足以益中國棄之不足以毒邊隅今若分道進兵衆須十

萬航海則有風濤之險由陸則冒瘴癘而行老師糜餉在在可慮且阮酋一再遣人赴我軍前謝罪未嘗逆天也

皇上順天而行倘爲之易主更姓除舊布新則天下有道守在四裔之意得矣文襄以爲然用其策入告

純皇帝是其說安南平歲庚戌

純皇帝八旬萬壽阮光平入朝祝嘏 恩賚有加粵西邊境至

今無事俊敘勞授雷瓊道調廣東糧儲道番禺縣之菱塘沙灣故盜藪也其民好鬪官不能禁俊密發卒捕其長置於法立鄉約以糾其不肖者進其秀者教之民心悅服俗爲之革盜魁何廣德將以嘉慶丙辰正月三日起事劫佛山府役曹

正得其耗告諸官巡撫朱珪以其事屬俊遂請令箭發撫標兵八百名舟船糗糧軍火一夕而辦兵出而民不知復偵知廣德有嬖童會城人卽拘其父母使作書約其子爲閒許以千金賞遂誘廣德踰山由郴桂一路遁入苗寨偷生而於中路伏卒擒之審訊得實磔於市西隆猓獮亭保正龍登連以羣苗反總督吉慶檄俊會同廣州副都統和興額往勦冒暑入山連戰破賊寨十數龍登連竄伏磨山洞中俊募土人諭降之以軍功 賞戴花翎戊午陞廣東按察使東莞客民陳禮南將爲亂俊知之密召東莞武舉王某至授以方略令於鄉人賽會日誘致賭博擒之辛酉陞山東布政使以廣東舊

事逮問事旣白奉

旨赴博羅軍營効力旣至博羅已平

惟永安鐵籠嶂尙有餘匪俊從

欽差大臣那彥成督辦搜

捕事竣以六品服授惠潮嘉道到官請嚴行保甲法餘匪悉

獲事聞

賞復四品服未幾陞按察使戊辰有

旨召還

以京堂用庚午以病乞歸當事延主紫陽書院訓課諸生一

以經術爲主嘉慶二十年卒俊讀書通達世務詩古文皆深

入古人堂奧書法效顏平原有榮性堂詩集二十卷行世弟

樹萱字少甫號壽庭乾隆庚子進士少與兄齊名由翰林庶

吉士改內閣中書歷官至吏部員外郎充鄉試主考者四分

校禮闈者一乾隆間奉

命視四川學政嘉慶四年檢發四

川以道員用一權鹽茶道印明年川督魁倫失機逮問樹萱
護解入京行至咸陽途次中暑卒著有霽春堂詩集十四卷

俊子慈鶴嘉慶戊辰進士現官國子監司業河南學政

家述

○李世望字蘭臺崑山人乾隆壬辰進士授刑部主事充提牢
時捕繫山東亂民王倫餘黨又金川逆酋就俘囹圄爲滿世
望襍被直宿最著勤慎遷員外郎總辦秋審處引律比例無
枉無縱擢雲南迤東道丁父憂服闋補湖南岳常澧道旋調
鹽法長寶道楚南食鹽係水販赴漢口領運商人昂價居奇
爲設法嚴禁隨時平減民皆稱便寶南局鑄錢多雜鉛鐵世
望乃重懲任事胥徒夙弊頓清長沙所屬湘陰等縣瀕大江

隄岸易衝激督率屬僚勤加修築田廬藉免水患奉檄往勘
岳常諸郡水災觸暑親行泥淖中詳舉被災情形得賑卹如
例先後三攝臬篆多所昭雪興寧民何姓誣李姓謀殺其子
株連纍纍世望爲反覆推鞠密遣幹員捕獲其子案始定桂
陽民女被惡少圖姦自戕陰賄女家寢其獄屢讞未決嚴訊
得實論如律遷長蘆鹽運使是時商力日絀而習俗侈靡世
望禁廚傳卻餽遺性澹泊至是益躬行節儉以倡導之風習
爲之一變以疾乞歸又十二年卒年七十八世望律身嚴整
在成均日相國尹繼善延主家塾師範卓然深器重之自以
浮沈諸生久宦轍所至喜獎飾士類云子以健字健行乾隆

辛丑進士授山西汾陽知縣調鳳臺歷刑部主事員外郎終養歸承遺命捐重貲修葺邑中文廟卒年六十一

崑新志彙

○沈之燮字汝枚吳縣人曾祖朝初見文苑傳父華湖南零陵縣知縣列祀鄉賢名宦之燮起家爲河南獲嘉縣知縣調祥符遷許州知州四十年擢山西寧武府知府調平陽府陞分巡冀寧道四十八年引疾歸卒年七十八居官廉幹識大體尤習於刑名其在祥符以聽獄爲何恭惠公焜所知焜任臬使日他郡有疑讞多委之燮會鞫平反甚衆其尤著者光州俞牛兒新野李拒弼二事牛兒故無賴一夕村民阮志被竊控官言牛兒等夜行竊縛事主輪姦其婦州獲犯旣招伏矣

之燮詰以昏夜行竊何由從容成姦志詞窮始言牛兒實竊非姦乃隣人愆患欲重其罪以除害牛兒等得不死李拒弼者李閆氏之姪閆氏無子養拒弼爲嗣爲娶陳惟善女拒弼天閫陳氏不安其室屢逃歸一日惟善送女至婿家還至中途女復趨歸惟善憤怒縊殺其女并自縊縣役酆純士者索賄於李弗得乃言閆氏與拒弼通令其兄閆國祥殺之縣令入其言掠治拒弼當抵極刑獄已成之燮覆驗得其情請釋二人而戍純士縣令亦得罪乃有左祖新野令者謂之燮枉斷故出人罪蜚語播京部臣卽以入告詔提人犯令軍

機大臣與刑部會審并調之燮赴質及會讞之燮極言拒弼

寃狀申辨再三諸郎官驗拒獨實天闔且受刑傷痕經年不減皆曰殆天意也遂以入奏如原斷在山西再署按察使秋讞多從輕比居家建祖祠捐田八十畝治家敦族周卹故舊多可稱者

錢大昕撰傳

○宋思仁字藹若號汝和長州人邦綏之子生時母蔣氏夢藤花盛開如慶雲因命曰積慶幼穎悟逾弱冠補諸生試輒冠其曹數舉不利援例議敘授四川簡州歲丁亥莅任繕修城垣擒治奸宄威信旣彰州乃大治時 國家用兵兩金川軍營檄備牛馬他邑輒用民力牧養資送思仁自出資給之民不知兵上官察其賢委署保寧府治瀕嘉陵江江水齧城根

城日蝕乃築護城隄鐵牛鎮之水患遂息丁父憂服闋補廣西橫州調西隆州州爲極邊烟瘴之地民夷雜處相構變生督撫移思仁往治至則擒其倡亂者王抱久等十四人置於法州境以寧庚子冬丁母憂服除選得安徽和州州俗多溺女不舉創建育嬰堂巡撫高文勤公給幼孤遂長之額以旌之乙巳歲旱民飢請帑金五萬以賑又煮粥以飼之冬寒出境收葬無主屍時江北道路屍相藉和州獨無州治臨江於城外鍼魚嘴設救生船以拯舟行遭風者州境香泉田圩舊被水不可耕治者一萬畝督民修治隄防其地仍爲膏腴丁

未遷山東泰安府所屬肥城有先賢有子後裔請於巡撫奏

置五經博士奉 旨允行庚戌

純皇帝巡幸山東登祀岱宗蒙 召見於行在奏對稱 旨

與宴 行宮拜錦緞荷囊之 賜并 賜詩章是歲調

濟南府癸丑遷山東糧儲道屬縣有私釋罪囚者事在思仁
守濟南時追論以失察降職遂引疾歸十餘年卒年七十八
思仁居官廉靜慈惠勇於興革其聽訟如家人反覆推求必
得其情境有古蹟必訪求而表章之在保寧修治張桓侯墓
在和州州廨有劉禹錫陋室水心亭故迹皆繕完之并畫像
刻石以示後人在粵西誤太平便覽在山東撰泰山記皆以

誌古今文獻性孝友居處儉約室無姬媵每以敦厚廉謹教
其子孫平生無絲竹六博之好惟善奕公餘時一及之嗜吟
咏著有橐餘存稿四卷廣輿吟二百篇善畫蘭竹於書無所
不窺通星命卜筮堪輿之術以決人窮通休咎無不驗在官
尤愛士乾隆丙午鄉試思仁在和州賓興決科擢陳生廷桂
敬生大科兩生先後成進士人稱其有知人之鑒其疾也倣
謝石測字之術以自卜座客或舉蘭字曰吾病殆不起蘭字
有十二月之象中從東十八日也此月十八日吾長逝之期
乎已而果然子榮廣西南寧府同知

○王若常字心如崑山人鶚兄子以錢塘籍入貲授兵馬指揮

歷光祿署正大理丞遷刑部員外郎擢知福寧府左遷山海關通判進薊州知州若常開敏有守精吏事在刑部平反冤抑爲尙書劉統勲所知守福寧日福康縣民某自其祖寄養他姓後爲所擯歸本宗又不許訟久不決若常呼本宗剴切理論族衆感服訟遂息福鼎縣民林姓誣服人命論死若常訊得實改讞贖令不可若常曰吾不能枉法庇一令卒釋之任薊州會當軸者營生壙於薊遣家奴劉姓督治劉要州官出迎并誅求供帳若常堅不肯忤當軸意遂引疾歸逾年卒

崑新志稟

○孫鎬字豐謀常熟人弱冠官睢州知州適豫省水災巡撫以

睢州稍殺請賑不許鎬卽發常平穀六千石貸之署歸德府丁祖母憂舊例祖在不得爲祖母承重鎬以奔喪請三上乃行遂著爲令服闋補保安知州量移奉天治中尋轉山西潞安府潞故三晉衝會稅入多贏裁去五千餘條商民兩便旋以屬吏牽累去官潞民傾城泣送左遷成都通判歷署寧遠嘉定眉州事值進討巴勒布總理軍需局從將軍出打箭爐口抵第哩琅古軍營聞母訃請奔喪不許奏留軍營哀毀勞瘁卒官年五十四將軍奏復原官鎬性豁達與人交披肝露膈遇人緩急解囊倒篋無少吝書畫俱工子源潮汾州通判

家述

○景如柏字東庭孝子流慶元孫常熟人以兵馬司指揮俸滿轉都察院都事改刑部主事遷員外郎慎密有幹畧上官倚之如右手乾隆四十六年甘肅逆回蘇四十三不靖總督李侍堯奏帶軍營辦事賊平補西寧道歷署臬篆民命出入常徹夜不寐期無枉縱而後止逆回田五作亂復隨軍營剿賊尋以病乞歸病痊仍發甘肅補安肅道卒於任如柏貌豐偉外圓通而內整肅臨政寬猛咸宜家本裕以仕宦破產篤於友恭代兄椿繳官項數千金而宦橐固蕭然也長子莢字書常增生少有文譽受知於劉文清公早卒

季學錦狀

○邱賜書字升朝吳江人監生乾隆二十年任湖北黃州府岐

亭同知吏白民間舊規額歲白金可千計悉革除之有惡僧中虛交通官吏橫行不法賜書廉得實嚴刑治之然性戇直不善事上官甫二年去任民製萬民衣傘焚香送於道歸後賃居虎邱老屋數椽蒔花種竹終其身

家狀

○王宗導字德音吳江人曾翼從子循例得廣東縣丞署四會

有舶賈以禁錢被誣宗導脫之賈感激攜金爲壽宗導曰聽斷非私恩磨之復署陽山獠民雜處獷悍健訟宗導至申明約束風乃易縣有虎患歐陽姓殺人詭稱虎啞成疑獄宗導研鞫得實置之法考績居最擢龍門知縣卒

王氏譜本傳

○葉元符初名幹鱗字根天元和人士寬孫父樹滋大定通判

元符舉乾隆三十九年順天榜補內閣中書遷侍讀嘉慶初出知河南汝寧府俗有盛刀會每歲二月羣攜械入市互誇拳勇莫敢誰何元符懲之俗遂革明年調衛輝府濬縣民婦邢福姐其姑導淫不從與惡少謀致死元符鞫得其情乃抵姑與惡少罪而表邢氏墓又漢徵士黃憲墓在正陽湮沒荆棘元符立石以誌輝縣西當濟瀆下流每漲發民廬多淹元符尋舊隄址築之水患遂息丁父憂歸旋卒

趙懷玉撰傳

○費振勳字策雲號鶴江震澤人乾隆乙未進士以四庫館書籤敘勞授內閣中書歷遷郎中提督廣西學政嘉慶己未轉御史擢吏科給事中巡視天津漕掌刑科事以老病請假歸

振勳在廣西剔奸釐弊不務姑息培士氣核真才如恐不及爲御史建言督撫考課州縣宜師漢循吏遺意以安靜悃愾勞心撫字者爲上考不得專取猥巧武健之人以病民又極言部院及直省胥吏因緣爲奸狀又以六部據例辦事無例者吏持短長因奏言欲收猾吏之權於曹司每司令主事一人專掌成案旣告歸爲正誼書院山長卒於家年七十九

家述

兄宏勳字書常銳志勵學與其羣弟有荀氏八龍之目乾隆己卯舉人官楚雄鹽課大使卒於官年未四十士林惜之

松陵

詩徵

○馮培字仁寓先世居錫山後隸元和籍乾隆壬辰舉人授內

閣中書入軍機處行走登戊戌進士選庶吉士改吏部主事
歷遷刑部郎中擢御史轉給事中爲人篤內行務切近之學
與人交和而介非義與之弗受也服官三十年歸無一椽以
館爲家歷主浙江崇文江蘇紫陽講席門下士多所造就工
詩古文辭晚好易輒凝神講玩自號讀易翁年七十二卒於
講院著有鶴半巢前後集二十卷行世

○王錕字振伯號翠亭吳江人父堡少孤力學乾隆丙子舉於
鄉早卒錕英敏好學乾隆戊戌成進士授兵部主事歷遷郎
中出知直隸大名府元城境內紅花隄屢決錕相度形勢順
流疏濬元城至今無水患調守保定廉得猾吏張三置之法

一郡帖然歷署清河通永永定河道飛蝗害稼錕率屬嚴捕
奏挖蝻保稼各條授甘肅鞏秦階道在保陽七年深悉地利
民風地高苦旱勸民多開井泉使天澤之氣常通又令多種
甘薯蓋薯性喜旱而惡雨也莅鞏秦階道任時教匪滋事入
秦地錕團練鄉勇得八千人無事散布各邑有事調集一處
倣古寓兵於農之意復製給兵器會賊首張漢潮竄成縣等
處錕督率鄉勇奮擊出境嘉慶己未賊復犯境錕綜理糧餉
軍火悉力籌運無悞擢浙江按察使留辦甘省軍務於所屬
各給密劄示戰守機宜州縣奉行有效賊偵知錕駐成縣軍
火器械胥貯於此率衆二萬并力攻擊城中兵止三百人錕

令登陴者掩旂鼓密於高處審其動靜賊退而造飯乃令壯勇以連環鎗突出轟擊賊狂竄所遺輜重無數六月賊退大府奏留銀督辦撫卹事八月賊匪又犯境銀令民修築堡寨崖洞預將糧食移貯其中賊至時攜家入避保全無數撫卹事竣賊又犯境大府檄銀守鞏昌城竟以積勞成疾卒於伏羌公廨年五十三

賜祭葬卹贈光祿寺正卿崇祀昭忠

名宦等祠所著有先正修身格言數十卷及聞喜齋集使黔集岷陽雜著若干卷

家述參同里志

○歸朝煦字升旭常熟人宣光第三子由廣西布政使歷陞鄖陽通判乾隆己亥豫省河決大吏奏調補曹儀同知旋改

曹單同知署歸德知府睢州下汛十三堡黃水潰隄朝煦承辦東壩時工緊料少議移運西廠料以濟急需而壩下水急不能渡乃于東岸釘大鐵索繫其尾於西岸令舟子挽索而東運料遂得到工東西壩相距十餘丈須兩旬藏事夜忽聞震裂聲往視則見壩上有漫水而壩根不動乃急集夫搶鑿黎明出水五尺薄暮卽合龍凡五日夜而工竣陞濟東道以平度州案呈誤左遷曹州知府尋陞直隸永定河道調山東運河道復以曹縣盜案失察事罷歸旣歸刊其高祖起先曾祖允肅著述校補其先太僕震川文集復梓其易經淵旨嘉慶庚午卒于家年七十四弟景照官至浙江布政使恩燕正

定通判

家述參縣志

○彭希濂字溯周號修田尚書啟豐孫增貢生紹咸長子乾隆甲辰進士歷刑部主事員外郎郎中明敏善斷入治曹事雖簿牒充棟必一一詳慎鈎決期得律法之平嘉慶戊午出督學貴州以清嚴明恕稱丁卯充福建正考官其冬擢內閣侍讀學士戊辰典順天武鄉試十二月遷鴻臚寺卿癸酉九月遷通政司副使十月擢光祿寺卿甲戌擢內閣學士兼禮部侍郎乙亥五月授刑部侍郎是冬以部牘延積降三品仍留任丙子三月以具題命案字句失檢 手詔詰問降正三品尋補左副都御史十一月復為刑部右侍郎戊寅秋兼權吏

部右侍郎己卯三月從耕藉以疾失儀降授福建按察使履任三月斷獄以千數皆手自判決延建邵三郡多猾盜希濂檄擒二十餘人戮之又戮漳泉海盜十六人間閭以安九月以疾卒於官年六十三希濂悃悃無華關節不到每 召對知無不言言無不盡與人溫敬終未嘗見喜愠之色

郭尚先撰墓碑

參曹振鏞撰墓誌

弟希洛有傳希涑字樂園乾隆丙午舉人早卒著

有二十二史感應錄蘭臺詩稿行世希鄭字會英乾隆己酉進士官常德知府希涑子蘊章嘉慶戊寅舉人

○彭希洛字景川號瑤圃又號簡緣紹咸次子年十五而孤毀瘠如成人讀書攻苦無間寒暑尤潛心理學嘗輯先儒語錄

擇其切近者爲證學編乾隆丁未成進士授兵部主事充四庫全書分校乞假歸五十八年補武選司主事歷陞郎中勤於政吏不得緣爲奸非公事不見上官事不可行者必力爭不少屈尤諳馬政郵政時值軍興兼辦車駕司事勾稽釐別稱允當焉四年陞福建道御史疏陳官吏徵銀浮收及督撫勒屬告病州縣諱盜爲竊等事皆洞中時弊蒙頒 諭通行五年母疾假歸三閱月而母卒哀毀致瘠教弟希涑子如己子居鄉族黨有急必力濟之凡平糶捐賑育嬰施棺瘞埋諸事任以實心年未五十以疾卒於家子蘊輝字遠望嘉慶四年進士改庶吉士授編修儀度玉立能文好善希洛卒後

三年亦卒年僅三十一蘊輝繼妻吳氏錢塘吳璫女名懷珍夫卒以身殉絕粒五日而卒

吳璫撰墓誌

○潘奕藻字思質號畏堂吳縣人乾隆甲辰進士選庶吉士散館改刑部主事歷陞郎中乾隆戊申主湖南鄉試丙辰以疾乞休嘉慶乙亥卒於家奕藻天性儉質敝衣羸馬如寒素而急人之急千金弗惜文詞沈實樸厚如其人專務根本之學不事矜飾而期於致用其官刑部也勤於平反精於條例胥吏莫能欺晚與兄奕雋先後解組歸田時人方諸漢之二疏

云 顧元熙撰墓誌

○周兆基字廉堂吳江人父永錦遊幕楚中遂家焉兆基生於

楚寄籍江夏縣乾隆己亥舉湖北鄉試甲辰成進士選庶吉士習國書授編修充山西正考官視陝甘學政嘉慶二年陞國子監司業歷遷少詹事視學安徽由詹事陞內閣學士兼禮部侍郎丙寅調順天學政陞工部侍郎丁卯充經筵講官是年奏請改歸原籍戊辰充浙江鄉試正考官署刑部侍郎己巳視學浙江轉吏部侍郎癸酉陞工部尚書回京充經筵講官甲戌充會試正總裁丙子署兵部尚書調禮部尚書卒年六十一兆基天性惇摯視從兄如同胞篤交遊獎士類人無間然其任浙江學政也爲玉環廳奏請加_以選拔貢生林芳後成進士玉環科第實始焉

家述

○王葆元字寰中崑山人父慤字受南官西安府經歷饒於濟署臨潼縣值歲禮格於例不得上達慤便宜令有力之家輸粟若干給以頂帶民皆頌德葆元天資豁達人貲補大定府水城通判大定所屬土神祠有田數頃安李二姓並執稱先業結訟數十年世遠莫證葆元馳勘地本川境改隸黔省時分撥熟苗安插安爲土著李則新撥葆元念必土著所置然無以服李沈思久之見祠隅懸古鐘一鏽蝕塵封拂拭之則建祠捐田者果安姓也案遂定時緬匪不靖黔省役苗民運餉至滇人負千金山路岐險鞘易亡失葆元承檄領運百萬乃請以鐵索連屬萬金十人分負互爲牽掣全運俱得抵滇

遷知威寧州歸尋卒

崑新志稟

○金宜遠號岑齋吳縣東山人嘉慶六年署安徽銅陵縣大通橋巡檢濱江有洋山磯最險挽舟者往往失足溺水宜遠鑿成坦徑勸畢吳二姓捐山建通濟庵招僧以董歲修設義漿燃夜燈以便行旅遐邇咸德之

○宋簡字長文號西樵元和人乾隆庚戌進士歷官雲南麗江縣貴州玉屏縣山東高密縣知縣清廉有守其署大定府水城通判時有土目犯事以多金關說簡定讞罰以充書院膏火嗣是絕不敢以賄賂嘗試年六十五卒於官著有說文齋聲若干卷

家述

○陳預字立凡一字笠帆吳江人其祖父始家於宛平父處學字景魚號蕤浹以宛平縣籍中乾隆乙酉科舉人丙子會試中式己丑 殿試分部歷官至甘肅鹽驛道以失察所屬捏灾冒賑案罷官發往新疆効力歲久敘辦理屯田勞績奏給主事銜尋放歸著有蛾術集塞垣吟草若干卷又工于制義預刻其稿以行世預亦以宛平通籍登乾隆戊申順天榜庚戌成進士選庶吉士散館授刑部主事歷升郎中總辦秋審治獄平允上官倚如左右手嘉慶己未秋尙書魁倫總督四川請簡部員八人備川省道府之用預名在選中其明年春魁倫以軍務得罪威勤公勒保再任川督奏委預總理全省

一切軍裝糧餉事務常駐達州預勾稽出入不濫不苛將士
牧令無不悅服補永寧道敘勞 賞戴花翎尋丁母憂回

籍服闋授山東兗沂曹道職司河工宣防悉合機宜旋升江
西按察使未幾升江寧布政使自陳原籍江蘇請迴避遂調
江西布政使遷刑部侍郎授福建巡撫未到官調浙江巡撫
未久又調山東巡撫所至勵精圖治百廢具舉其在山東以
曹單間教匪蠢動去官

上知預嫻吏事仍以部曹用旋膺未疾不起卒於家弟雲字遠
雯乾隆癸丑進士第二人授編修歷官太平知府引疾歸僑
寓杭州之武陵門內

○吳英玉字玉泉常熟人以國子生官湖南歷署按察使司獄
長沙衡陽湘潭縣丞所至有惠政奉委治攸縣水災議開
支河立石堰自此攸境無水患補零陵典史以卓異聞乾隆
五十九年零陵大水民無宿糧英玉倡輓轡轉運之議郡守
王宸從之民賴以存活六十年楚苗蠢動總督畢沅檄調英
玉隨營辦事是時雲貴總督福康安統兵由黔入楚巡撫姜
晟委英玉解餉至營福公奇其才子功脾分給鄉勇五百人
令隨總兵花連布勦賊敘功陞湘潭縣丞嘉慶元年七月花
連布營於馬鞍山苗人夜至英玉方患病強與枝梧焚山斷
路糧臺藉保無恙英玉竟以力瘁卒於軍事聞 詔贈國子

監學錄 賜祭葬入祀昭忠祠子謙現官紹興南塘海防通

判家述

○沈酉字書山吳縣人先世吳江明副使啓之後嘉慶辛酉進士選庶吉士散館改知縣選河南遂平知縣判決如流案無留贖錢穀親自稽查胥吏不得緣爲奸遇水旱禱輒應莅任九年卒宦橐蕭然沒之明年遂平大旱祈禱無應邑民奉酉木主上山求雨雨遂大霑酉書法適媚尤工制義云家述

○王慶瀾字靜波元和人歷官河南邠縣典史濟源巡檢太原縣丞所至以明慎稱調赴河工嘉慶己卯補陳州府沈項槐店縣丞槐店係回民雜處慶瀾常易服緝奸懲治盡法道

光二年正月二十一日爲革役劉萬雲戕害地方紳民請捐

貲建祠事 聞奉 旨着加恩賞知縣銜並准建立專祠

以彰循績家述

○程際韶字夔九一字簫庭吳江人嘉慶戊辰進士以知縣分發甘肅署崇信縣大旱禱雨有驗補清水甲戌正月陝西鳳翔匪民擾害數郡際韶修兵器設卡房募鄉勇千人分十隊以武生爲隊長晝夜輪流守城賊不敢入境調寧夏日決數十事案牘一清中衛縣渠隄屢築屢圯大吏委修焉至則伐隄柳數百株編堤外以殺水勢不匝月工成費數百金而已陞蘭州循化同知循化番回雜處蒙古每畏黑番際韶戮其

渠魁蒙古得安處地多風少雨不生五穀僅種青稞歲不常
豐際韶莅任後禱于河源廟雨澤常足近城有種黍者道光
元年卒于官年五十九著有番寨柳枝詞留詩閣稿若干卷
家述

蘇州府志卷第八十七終



